

मर्कूस

ब्रेक्ब मुर: एको किताब ब्रेक्ब मुर मर्कूस बाक्ब। मेकोमी आंम आ पर्वम मर्कूस १४:५१-५२ ब्रेक्शो बाक्ब। मेको आ यहूदी नें यहन्ना बाक्त, मेको आ रोमी नें चहिं मर्कूस बाक्त। मर्कूस बारनाबास आ याच बाक्त। मेको पावल नु बारनाबास काथा लमा बाक्त। तन्न मेको आस कली प्रोइशशा, यरूसलेम लेम्माक्त। प्रेरित १३:५, १३ नोले पवलम मेको आ पर्वम रिम्शो लोत्र पवा बाक्त। मेको कली लेंशा, रोम सहरम वारच पचा कली ब्रेक्शो बाक्त। रतिमोथी ४:११ मर्कूसमी पत्रुस कली वारच पा, आ शेंतीक लोत्र रोमी लोत्रम सेला बाक्त। मिनु मेको लोत्र मसाम्चा कली नेल्ल ब्रेक्ता बाक्त।

गेना ब्रेक्शो: मर्कूस ६३-६४ ए. डी. रोम सहर जाक्माक्त। मेना थमा सुइक्ब आन कली रोम डा सिजर नेरो आ पतीकेमी खेदा पचा गोत्रमे बाक्त। मिनु मेको किताब ६४-६५ ए. डी. मेर खोदेशो ब्रेक्शो बाक्ब। तन्न ७० ए. डी. क्येडा डोंइती दुम्चा माल्ताक्व। मारदे हना यरूसलेम सहर कली खतम सेल्टीके आ पर्वम मारेइ मब्रेक्शो बाक्त।

मारदे ब्रेक्शो: मर्कूसमी आ किताबम येसु आ पशो छक लाक्चा डा गेय आ पर्वम शुश ब्रेक्ताक्व। मेको पत्रुस आ शेंतीक लोत्र रे बाक्ब। येसु आ गेय डा नेल्ल क्येडा ठेयब लोत्र बाक्नीम। येसु परमप्रभु यावे आ गेय पाइब दुम्तीके किताब नेल्लेम कोंइशो बाक्ब, देशो बाक्ब। मर्कूस १०:४५

ब्वाक्कुम खुम्शा गुंडब यहन्ना

मत्ती ३:१-१२; लूका ३:१-१८; यहन्ना १:१९-२७

1 एको परमप्रभु यावे आ तौ येसु ख्रीस्त आ पर्बम ब्रेक्शो ग्येरपाइक्ब लोत्र बाक्ब। मेको लोत्र दोदेशो पा गोइब देशा हना,

2 परमप्रभु यावे आ लोत्र पाइब यसैयामी ब्रेक्शो लोत्रमी मार ब्रेक्शो बाक्त देशा हना “नेनो, इ डोंइती आं लोत्र पाइब सोइक्नुड। मेकोमी इ लां थेल्ब। मत्ती ११:१०

3 गोरशो रागीमी सेंदा कामी ‘प्रभु आ लां थेलीने। आ गाक्तीके लां फुल्लु ग्रोक्शा थेलीने’ देशो नेंसीब” दे ब्रेक्शो बाक्ब। मलाकी ३:१; यसैया ४०:३

4 ब्वाक्कुम खुम्शा गुंडब यूहन्ना गोरशो रागीम गूशा, मुर आन कली “इन पाप क्याम्चा कली इन थुं परमप्रभु यावे गे लेत्तीने। आंइ थुं लेत्ताक्क दे कोंइचा कली ब्वाक्कुम खुम्शा गुंडपांइसीने” दे लोत्र पाइक्बाक्माक्त।

5 मिनु यहूदीया रागी नु यरूसलेम सहर डा मुर नेल्ल मेकेर जाक्शा, आन पाप शोत्रशा, यूहन्ना रे पा यर्दन खोलाम खुम्शा गुंडचा पुंडसमा बाक्त।

6 यूहन्नामी दलओंठ आ चां के प्रोत्रशो वा फेक्बाक्माक्त। कुशुल के किप्शुर किप्बाक्माक्त। मिनु सल्हा माले ब्वशा नु रोका खुदो जशा बाक्बाक्माक्त।

7 मिनु मुर आन कली “आं नोले जाक्ब आं क्येडा सक्ति पाइश्शो बाक्ब। गो मेको आ डोंइती बाप्शा, आ जुत्ता पुइक्चा लायो मशिरनुड।

8 गो इन कली ब्वाक्कुम खुम्शा गुंडताक्न्नी। मेकोमी चहिं इन कली परमप्रभु यावे आ सोक्तीमी खुम्ब” दे मुर आन कली शेंना शेंन बाक्बाक्माक्त।

येसु ब्वाक्कुम खुम्शा गुंडचा पुंडसीशो

मत्ती ३:१३-४:११; लूका ३:२१-२२; लूका ४:१-१३; यूहन्ना १:३२-३४

9 मेना येसु गालील रागी डा नासरथ सहर रे गाक्शा, यूहन्ना आ बाक्तीकेमी जाक्माक्त। मिनु यूहन्ना रे पा यर्दन खोलामी ब्वाक्कुम खुम्शा गुंडपांडसे बाक्त। लूका २:५१

10 मिनु ब्वाक्कुमी गुम्शा ग्रूमेनु, सरीड रोकसीशा, परमप्रभु यावे आ सोक्त परवा खोदेशो पा यिशा, आ तारी जुक्शो तवा बाक्त।

11 मिनु सरीड रे “आं दाक्शो तौ नवे। इ कली तशा थाम्पा ग्येरसीनुड” देशो सेंदा नेंसे बाक्त। मर्कूस ९:७

येसु थुं थाम्चा पुंडसीशो

12 मिनु नोले परमप्रभु यावे आ सोक्तीमी येसु कली गोरशो रागीम लदा बाक्त।

13 मिनु गोरशो रागीम ४० नाक्त सम्म बाक्माक्त। मेकेर बाक्मेनु, सैतान रे पा थुं थाम्चा पुंडसे बाक्त। मेको गोरशो रागी डा जन्तुपुकी नु बाक्माक्त। परमप्रभु यावे आ स्वर्ग डा गेय पाइबपुकीमी मेको कली वारच पामे बाक्त।

येसुम परमप्रभु आ लोत्र नेंपाइशो

14 यूहन्ना जेल्खानमी चोक्चा पुंडसे नोले, येसुमी गालील रागीमी परमप्रभु यावे आ ग्येरपाइक्ब लोत्र नेंपाइक्ना पाइक्न गाक्माक्त।

15 मेकोमी “परमप्रभु यावे आ देशो नाक्त जाक्त। आ राज्य इन नेक्था जाक्शो बाक्ब। इन थुं परमप्रभु यावे गे लेशशा, आ ग्येरपाइक्ब लोत्र थमा सुतीने” दे नेंपाइक्ना पाइक्न गाक्माक्त। गलाती ४:४

येसुमी शेंसीब आन कली ब्रेशो

मत्ती ४:१८-२२; लूका ५:१-११; यूहन्ना १:३५-५१

16 मिनु येसु गालील समुन्द्र आ नेक्था हिरसेनु, सिमोन नु आ लोक्ब अन्द्रीयास ग्याइल आप्शा, डांड रेन्ना रेन्न बाक्शो तवा बाक्त। मेको निक्शी डांड रेप्ब बाक्सा बाक्त।

17 मिनु येसुमी मेको आस कली “आं नोले खोइय्यीसी। मिनु मुर आन कली रेप्ब सेल्नन्सी” दे माइक्सी बाक्त।

18 मिनु ग्याइल थु था प्रोंइशा, आ नोले खोइशशा गाक्सा बाक्त।

19 मिनु इच्ची आइक्की लशा, जब्दी आ तौ निक्शी याकूब नु यूहन्ना वोबु आस कली डोंगाम बाक्शा, गाक्शो ग्याइल प्रोव्रना प्रोव्रन पशो ताम्सी बाक्त।

20 मिनु मेको आस कली यो ब्रेत्तीम्सी बाक्त। मिनु आस आफ जब्दी नु गेय पाइब आन कली प्रोंइशा, आ नोले खोदसे बाक्त।

वोल कली ग्रुंइशो

मत्ती ८:१४-१७; लूका ४:३१-४४

21 मिनु कापेरनाउम सहरम जाक्दीम्मा बाक्त। मिनु नाइक्तीक नाक्त येसुमी गुम्तीक खिं लशा, मुर आन कली शेंदीमी बाक्त।

22 मेको आ शेंशो नेंशा, नेल्ल छक लाक्मा बाक्त। मारदे हना सास्त्री आन लोव्र खोदेशो ममाइ। अधिकार पाइशशो लोव्र पा शेंदीमी बाक्त। सास्त्री यहूदी आन कली परमप्रभु यावे आ अरेशो लोव्र शेंब बाक्शो बाक्तेक्म। मत्ती ७:२८-२९

23 मिनु मेको गुम्तीक खिंमी ग्रांग्रा दिचा डा वोलमी सुम्शो मुर का बाक्माक्त।

24 मिनु मेको वाइ ब्रेशशा “ए नासरथ डा येसु, मार पमुया डा? आंइ कली खतम पोक्थ जाक्नी? गो इन कली तुइक्नीकी। गे परमप्रभु यावे आ योव्रशो ननी” देंमा बाक्त। मर्कूस ५:७

25 मिनु येसुमी वोल कली “सिक्सी पावो। मिनु गूडो” दे हुइक्ता बाक्त। मर्कूस ९:२६

26 मिनु ग्रांग्रा दिचा डा वोलमी मुर कली दिड खोल्शा, वाइ ब्रेशशा गूमाक्त।

27 मोदुम्शो तशा, मुरपुकी छक लाक्शा “मार बाक्म माइ? नक शेंतीक लोव्र बाक्म कोर में? अधिकार पाइशशो लोव्र पवानु, ग्रांग्रा दिचा डा वोलम लायो टीबाक्तेक्म” देंमुमा बाक्त।

28 मिनु गालील रागीमी तेइ तेइ येसु आ पर्बम लोव्र ब्रना ब्रन लमाक्त।

रोइ पाइब आन कली सापाइशशो

29 मिनु वोल कली गुंडशा, येसु गुम्तीक खिं रे सिमोन नु अन्द्रीयास वोबु आस खिंम जाकदीम्माक्त। मिनु याकूब नु यूहन्ना यो येसु नु काथा बाक्सा बाक्त।

30 मिनु जाकदीम्मानु, सिमोन आ शिमी जरो पा गोलशो बाक्माक्त। मिनु येसु कली तुइक्पदमे बाक्त।

31 मिनु येसु मेको आ नेक्था लशा, आ गुइ ग्याइश्शा पोक्गा बाक्त। मोपा पोक्गानु, जरो जाम्माक्त। मिनु सेस दुम्शा, मेको आन कली मान पा थुल्मी बाक्त।

32 मिनु नां रिक्मेनु, मेको सहर डा मुरपुकीमी रोइ पशो नु वोलम सुम्शो मुर नेल्ल आन कली चाक्मे बाक्त।

33 सहर डा मुर नेल्ल खिं डा लाप्चो आ डोंइती खुम्समा बाक्त।

34 मिनु येसुमी रोइ पशो शुश मुर आन कली सापदा बाक्त। मिनु शुश वोल आन कली हुइश्शा खेरमी बाक्त। वोल आन कली लोत्र पचा मगेवा बाक्त। मारदे हना वोलपुकीमी येसु कली तुइश्शो बाक्तेक्म। प्रेरित १६:१७-१८

35 आ दीसा सुनी नां मसोत्रथु, येसु बोक्शा मेकेर रे गाक्शा, सुइ मबाक्तीकेमी जाकदीश्शा, प्रार्थना पवा बाक्त। मत्ती १४:२३; मत्ती २६:३६; लूका ५:१६; लूका ११:१

36 मिनु सिमोन नु मेको नु बाक्बपुकीमी येसु कली माल्मे बाक्त।

37 मिनु गुम्शा, येसु कली “मुर नेल्लेमी इन कली माल्शो बाक्नीम” दे मदमे बाक्त।

38 मिनु येसुमी “मेकेर रे लशा, एर ओंथ गाउं सहर हिरशा लय। मारदे हना मेकेर यो शेंथ जाक्ती” देंमाक्त।

39 मिनु गालील रागी नेल्ल हिरशा, गुम्तीक खिंमी शेंबाक्माक्त। वोल आन कली खेरबाक्माक्त।

कोर पाइब कली सापाइश्शो
मत्ती ८:२-४; लूका ५:१२-१६

40 मिनु कोर पाइब का जाकशा, येसु आ डोंइती आ पोक्च थेक्शा “सापाइक्चा दाक्ताक्नी हना, आं कली सापाइक्ने चाप्नीनी” दे सेउ पशा पुना बाक्त।

41 मिनु येसुमी शिशी पा आ गुइ दिंशा, कोर पाइब कली थिशा “गो सापाइक्चा दाक्नुड। साडो” देंमाक्त।

42 मो देंमेनु, कोर सामाक्त।

43 मिनु येसुमी “सुइ कली मशेंदो। मर्कुस ३:१२

44 चढेब आ डोंइती लशा, इ साशो रां कोंइदो। मिनु मुर नेल्ल आन कली ‘गो साती’ दे तुइक्पाइक्चा कली मोसाम देशो खोदेशो पा चढेवो” दे माइश्शा सोइक्ता बाक्त। मर्कुस ७:३६; लेवी १४:२-३२

45 मिनु साशो मुर मेकेर लशा, दोपा सामे, मेको लोव्र तेइ तेइ ब्रपदा बाक्त। मोदेशो लोव्र ब्रतीके येसु सहर सहरमी गाक्ने मचबा बाक्त। मोपतीके शुश मुर मबाक्तीकेमी बाक्माक्त। तन्न मुरपुकी तेइ तेइ रे जाक्बाक्मा बाक्त।

2

गुइ खोइली मदुक्ब कली सापाइश्शो

मत्ती ९:१-८; लूका ५:१७-२६; यूहन्ना १:१९-२७

1 नाक्त का निक्शी नोले कापेरनाउम लेम्माक्त। मिनु मुरपुकीमी “येसु खिंमी बाक्ब” दे तुइक्तमे बाक्त।

2 मिनु मेकेर शुश मुर खुम्सीशा, लाप्चोमी यो मुरपुकी देल्मा बाक्त। मिनु येसुमी मेको आन कली परमप्रभु यावे आ लोव्र शेंदीमी बाक्त।

3 मिनु ४ जना मुरपुकीमी गुइ खोइल मदुक्ब मुर का कुरशा चाक्मे बाक्त।

4 शुश मुर देल्टीके येसु आ डोंइती चाक्दीन्ने मचाप्मे बाक्त। मिनु खिं डोइश्शा, फुल्लु याक्शा, ओंइतीके सेलमे बाक्त। मिनु गुइ खोइल मदुक्ब कली कुरशो ब्राख्ये एर ओंथ डोरीम पाइश्शा, ओंखां पा येसु आ डोंइती तोक्गमे बाक्त।

5 मिनु येसुमी मेको आन कली मो पशो तशा, थमा सुइय्यीमी बाक्त, दे तुइक्ता बाक्त। मिनु गुइ खोइली मदुक्ब कली “आं तौ, इ पाप क्याम्साक्व” देंमाक्त।

6 मेकेर सास्त्रीपुकी यो बाक्शो बाक्मा बाक्त।

7 मेकोपुकीमी येसु आ लोत्र नेंशा, आन थुमी “दोदेंशो लोत्र पवा? परमप्रभु यावे कली शुक्शी पाइबाक्त। सुमी पाप क्याम्ने चाप्वा डा?” दे मिम्तमे बाक्त। भजन संग्रह १३०:४; यसैया ४:३, २५

8 मिनु येसुमी आन मिम्शो तुइश्शा, मेको आन कली “मारदे मोदेंशो मिम्तीनी?

9 गुइ खोइल मदुक्ब कली ‘इ पाप क्याम्साक्व’ देंचा देय ‘छुल बोक्शा, इ ब्राख्ये कुरशा, एर ओंथ हिरशा कोंइदो’ देंचा, तेको सक्ति कोंइतीक लोत्र बाक्बा?

10 रागीमी जरमेशोमी पाप क्याम्चा अधिकार तशो बाक्ब, दे गेपुकीमी यो तुइक्ताक्नी” देंमाक्त। मिनु गुइ खोइली मदुक्ब कली

11 “छुल बोक्शा, इ ब्राख्ये कुरशा, इ खिं लेतो” दे मदा बाक्त।

12 मिनु नेल्ल आन डोंइती मेको बोक्शा, आ ब्राख्ये जो गुप्शा कुरशा, गाक्माक्त। मिनु नेल्लेमी छक लाक्शा “ओदेंशो छक लाक्चा डा गेय मुल सम्म गेनायो मतशो नय” देंशा, परमप्रभु यावे कली ठेयब सेल्मे बाक्त।

लेवी कली ब्रेशो

मत्ती ९:९-१३; लूका ५:२७-३२

13 मिनु येसु मेकेर रे लशा, लेंशा समुन्द्र आ नेक्था बाक्माक्त। मिनु मेकेर शुश मुर देल्मा बाक्त। मिनु येसुमी मेको आन कली शेंदीमी बाक्त।

14 मिनु मेकेर रे लशा, तिरो पोक्ब अल्फयस आ तौ लेवी कली तिरो पोक्तीकेमी बाक्शो तशा “आं नोले खोइय्यी” दे ब्रेत्ता बाक्त। मिनु मेको बोक्शा, आ नोले खोदा बाक्त।

15 मिनु लेवी आ खिंमी जना जन बाक्मानु, तिरो पोक्ब नु पापी शुशु नु काथा जामे बाक्त। मारदे हना शुशेमी येसु आ नोले खोदमे बाक्त।

16 मिनु फरिसी आन दाते डा सास्त्रीपुकीमी येसु कली पापी नु तिरो पोक्बपुकी नु काथा बाक्शा जशो तशा, येसु आ शेंसीब आन कली “मारदे तिरो पोक्बपुकी, पापीपुकी नु काथा बाक्शा जाइबा?” देंमा बाक्त।

17 मिनु येसुमी मेको आन लोत्र नेंशा, मो देंब आन कली “रोइ मपशो मुर डाक्टर ममाल्नीम। रोइ पशो मुर ला डाक्टर माल्नीम। ठीक पाइब कली ममाइ, पापी आन कली ब्रेत्थ जाक्शो नड” दे माइक्मी बाक्त।

माइजा बाक्चा

मत्ती ९:१४-१७; लूका ५:३३-३८

18 यूहन्ना आ शेंसीबपुकी नु फरिसीपुकी माइजा बाक्बाक्मा बाक्त। मिनु मुरपुकीमी येसु आ नेक्था जाक्शा “यूहन्ना आ शेंसीबपुकी नु फरिसी आन शेंसीबपुकी माइजा बाक्नीम। इन शेंसीबपुकी चहिं माइजा मबाक्नीम। मारदे मो पशो नमी?” दे हिल्लो पामे बाक्त। फरिसी रिती थिती सेल्शा, रिम्शो पचा कली कोत्रब यो बाक्शो बाक्तेक्म।

19 मिनु मोदें हिल्लो पाइब आन कली येसुमी “जन्तीपुकी ग्युम्ले नु बाक्मानु, माइजा बाक्ने मचाप्नीम।

20 काबु चहिं ग्युम्ले नु फ्राचा पुंइसीनीम। मिनु माइजा बाक्नीम।

21 सुइमी माइत वामी नक वा क्येप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। मारदे हना माइत नु नक मगारब।

22 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा, थैलो खाक्शा क्युप्ब। थैलो यो गाक्ब। नक शांबु नक थैलोमी ला गारब” दे शेंदीमी बाक्त।

नाइक्तीक नाक्त आ पर्बम लोत्र
मत्ती १२:१-८; लूका ६:१-५

23 मिनु काबु नाइक्तीक नाक्त येसु नु आ शेंसीबपुकी चेरब रू लां गाक्मा बाक्त। मिनु गाक्मानु, शेंसीबपुकीमी चेरब बाला शोइक्चा गोत्रमे बाक्त।

24 मिनु फरिसीपुकीमी येसु कली “कोत्रडीन, नाइक्तीक नाक्तीमी पचा मदुम्ब गेय मारदे पाइनीमी?” दे मदमे बाक्त।

25 मिनु येसुमी “दाऊद नु आ वारचपुकी शोत्रलु बेक्मानु, दाऊदमी मार पवा, मेको ब्रेक्शो लोत्र गेनायो मपढेनी?

26 ठेयब चढेब अबीयाथार आ पालामी दाऊद परमप्रभु यावे आ खिं ओत्रशा, परमप्रभु यावे कली चढेशो शोब्ले शोल्शा जशा, आ वारच आन कली यो जचा गेवा बाक्त, दे मपढेनी? मेको शोब्ले चढेबपुकीमी ला जाइबाक्मा बाक्त। अर्को मुरपुकीमी जचा मदुम्ब बाक्माक्त। १सामुएल २१:७; लेवी २४:९

27 नाइक्तीक नाक्त मुर आन कली वोइशो बाक्ब। मुरपुकी नाइक्तीक नाक्त कली ममाइ। प्रस्थान २०:१०

28 मोपतीके रागीम जरमेशो दा नाइक्तीक नाक्त मार पचा, मार मपचा मेको अधिकार पाइब बाक्ब” दे शेंदीमी बाक्त।

3

नाइक्तीक नाक्त आ पर्बम लोत्र
मत्ती १२:९-१४; लूका ६:६-११

1 मिनु येसु गुम्तीक खिं लेंशा ओत्रमाक्त। मेकेर गुइ सोत्रशो मुर का बाक्माक्त।

2 मिनु फरिसी नु सास्त्रीपुकीमी “नाइक्तीक नाक्ती सापाइक्तीक गेय पाइबा को” दे योत्रकी पा कोत्रडमे बाक्त, मारदे हना दोस गेचा मालशो बाक्मा बाक्त।

3 मिनु येसुमी गुइ सोत्रशो मुर कली “एक पिवो” दे मदा बाक्त।

4 मिनु योव्रकी पा कोव्रब आन कली “नाइक्तीक नाक्त शिशी पचा देय मरिम्शो गेय पचा? ब्रोंइचा गेचा देय साइक्चा? तेको लोव्र अरेतीक लोव्र नु गारबा?” दे हिल्लो पवानु, सिक्सी पामे बाक्त।

5 मिनु सिक्सी पा बाक्शो तशा, आ थुं खाइश्शा गाइश्शा, मेको आन कली का का पा कोव्रशा, गुइ सोव्रशो कली “इ गुइ दिंदो” दे मदा बाक्त। मिनु मेकोमी गुइ दिंसेनु सामाक्त।

6 मिनु फरिसीपुकी गूशा, हेरोदी आन कली शो शु खुप्शा “मेको कली दोपा साइक्चा ताइनय” दे लोव्रसी पामे बाक्त।

मुर आन कली सापाइश्शो

मत्ती १२:१५-१६; लूका ६:१७-१९

7 मिनु नोले येसु नु आ शेंसीबपुकी सहर रे गाक्शा, गालील डा समुन्द्र आ नेक्था जाक्दीम्मा बाक्त। शुश मुरुमी आन नोले खोदमे बाक्त। मेको खोइक्बपुकी ते ते डा बाक्मा बाक्त देंशा हना, गालील नु यहूदीया रागी डा, मत्ती ४:२५

8 यरूसलेम सहर डा, इदुमेआ रागी डा, यर्दन खोला आइक्ची हांबु डा टायर नु सीदोन सहर डा बाक्मा बाक्त। मेकोपुकीमी येसु आ पशो गेय आ पर्बम शुश लोव्र नेंशा जाक्मा बाक्त।

9 मिनु येसुमी आ शेंसीब आन कली “डोंगा का चाक्शा वोतीन” देंमाक्त। मारदे हना शुश मुरपुकीमी नेप्शा चुशा, येसु आ नेक्था जाक्चा बोल पामे बाक्त।

10 येसुमी रोइ पाइब शुश आन कली सापदा बाक्त। रोइ पाइबपुकीमी “थिचा तडल” दे आ नेक्था जाक्मा बाक्त।

11 ग्रांग्रा दिचा डा वोलपुकीमी येसु कली तशा, पोक्च थेक्शा “परमप्रभु यावे आ तौ ननी” दे वाइ ब्रेम्मा बाक्त। लूका ४:४१

12 मिनु येसुमी “एको लोव्र मब्रपाइक्चा” दे माइक्मी बाक्त। मर्कूस १:४३-४४

१२ जना शेंसीबपुकी वोइशशो

मत्ती १०:१-४; लूका ६:१२-१६

13 काबु येसु डांडा डोंइसे बाक्त। मिनु सु सु आन कली योब्रडा, मेको आन कली आ नेक्था ब्रेत्ता बाक्त। मिनु मेको ब्रेशशोपुकी जाक्मा बाक्त।

14 आं नु काथा बाक्चा कली नु शेंथ सोइक्चा कली

15 वोल खेरतीक अधिकार तशा बाक्मल, दे १२ जना आन कली वोइक्मी बाक्त।

16 मेको १२ जना आन नें सिमोन आ याइनी नें पत्रुस वोदा बाक्त।

17 जब्दी आ तौ याकूब नु आ लोक्ब यूहन्ना, मेको आस कली बोअनेरगेस नें वोदा बाक्त। बोअनेरगेस देशो “बुंबु आ तौ नस” दे रुम्सीब। लूका ९:५४

18 मिनु अन्द्रीयास, फिलीप, बारथोलोमाइ, मत्ती, थोमास, अल्फयस आ तौ याकूब, थदेयस, सिमोन कनानी

19 नु यहूदा इस्कारीयोती बाक्मा बाक्त। यहूदा चहिं नोले येसु कली साइक्ब आन कली लां कोंइब दुम्माक्त।

येसु नु आ खिं डा मुर

20 मिनु लेंशा शुश मुर खुम्समानु, येसु नु आ शेंसीबपुकी जचा कली यो नाइक्चा मतामे बाक्त।

21 मिनु येसु आ खिं डा मुरपुकीमी मेको नेंशा “आ निप्स ग्यशो दुम्माक्त, दोपा यो खिं लाइक्चा” दे ब्रथ लमा बाक्त। मर्कूस ६:४; यूहन्ना ७:५; यूहन्ना ८:८४

येसु नु वोलपुकी

मत्ती १२:२४-३२; लूका ११:१४-२३

22 यरूसलेम रे यिशो सास्त्रीपुकीमी “बेल्जीबुलमी सुम्शो बाक्माक्त। वोल आन पिप आ सक्तिमी वोल आन कली खेरबाक्माक्त” देंमा बाक्त। मत्ती ९:३४

23 मिनु येसुमी मेको आन कली आ नेक्था ब्रेशशा, कथा सेल्शा “सैतानमी सैतान कली खेरने चाण्बा डा?

24 राज्य का डा मुरपुकी जिशा ब्राशा गाक्तेक्म हना, मेको राज्य जाम्शा लाइब।

25 खिं का डा मुरपुकी जिम्तेक्म हना, मेको खिं मलीब।

26 सैतान आ राज्यम जिशा ब्रातेक्म हना, आ राज्य नुष्शा लाइब।

27 बोल्यो मुर आ खिंम सुइ खुइ पथ ओव्रने मचाप्नीम। बोल्यो मुर कली फ्रेशा पाइशशा वोइशशा ला, आ मारेइ मारेइ खुइ पने चाम्सीब।

28 नोफा दाइशशा नेनीन, मुरपुकीमी पाप पाम्तेक्म हना यो, आन पशो पाप क्याम्चा ताइनीम। मरिम्शो लोव्र पाम्तेक्म हना यो, मेको पाप यो क्याम्चा ताइनीम।

29 तन्न परमप्रभु यावे आ सोक्त आ पर्बम मरिम्शो लोव्र पशो पाप चहिं मक्याम्सीब। मोदेशो लोव्र पाइब आ पाप गेना हना यो लीब” देमाक्त। हिबू ६:४-६

30 मारदे हना मेकोपुकीमी येसु आ पर्बम “येसु ग्रांग्रा दिचा डा वोलम सुम्शो बाक्माक्त” देशो बाक्मा बाक्त। यूहन्ना १०:२०

येसु आ खिं डा मुर जाक्शो

मत्ती १२:४६-५०; लूका ८:१९-२१

31 मिनु येसु आ ममा नु आ लोकबपुकी आ बाक्तीक लाङगामी जाक्मा बाक्त। मिनु “गो गुम्थ जाक्तक” दे तुइक्पाइक्थ मुर सोइक्तमे बाक्त।

32 मेकोपुकी जाक्मानु, शुश मुर खुम्सीशा, येसु आ नेक्था बाक्शो बाक्मा बाक्त। मिनु मेको नेक्था बाक्बपुकीमी “इन ममा नु इन लोकबम लोकब लाङगाम जाक्शा, इन कली ब्रेत्ताक्मे” दे मदमे बाक्त।

33 मिनु येसुमी “आं ममा नु आं लोकबपुकी सु नमी?” देशा,

34 आ नेक्था निशशा बाक्ब आन कली कोव्रशा “एकेर बाक्ब आं ममा नु आ लोकबपुकी नम।

35 परमप्रभु यावे आ दाक्शो पाइबपुकी आं लोक्ब नु आं ममा नम” देंमाक्त।

4

वांचेर शोक्शो कथा
मत्ती १३:१-९; लूका ८:४-८

1 मिनु समुन्द्र आ नेक्था लशा, मेकेर बाक्शा, लेंशा शेंचा गोवा बाक्त। मेकेर शुश मुर खुम्सीशो बाक्मा बाक्त। आं चहिं डोंगा काम डोइशशा बाक्शो बाक्माक्त। आ लोत्र नेंबपुकी समुन्द्र आ नेक्था बाक्मा बाक्त।

2 मिनु कथा सेल्शा, शुश लोत्र शेंदा बाक्त।

3 मिनु शेंना शेंन “नेनीने, मुर का वांचेर शोक्थ लमाक्त।

4 मिनु ब्वारानु, गेडा का निक्शी लांमी जुक्तमे बाक्त। मिनु चिक्बीमी गुप्शा जामे बाक्त।

5 गेडा का निक्शी ग्याडग्रो खपीमी जुक्तमे बाक्त। मिनु शुश खप मबाक्तीके थे थु बुक्शा, जिव जाव वामा बाक्त।

6 तन्न नां पवानु, सोल सुल बेक्मा बाक्त, मारदे हना शाक्श थोक्चा मतथु सोत्रमा बाक्त।

7 का निक्शी चू आ दातेमी जुक्तमे बाक्त। मिनु चूमी सुम्शा, बारचा मगेवा बाक्त। मिनु मसिम्माक्त।

8 का निक्शी चहिं रिम्शो खपीम जुक्तमे बाक्त। मिनु वाशा बारशा, शुश ग्रेल्शा, गेडा का के ३०, ६०, सहे का सम्म सिम्मा बाक्त” दे शेंदीमी बाक्त।

9 मिनु “सु के नेंब नोफा बाक्मे, मेकोमी नेंनल” देंमाक्त।

वांचेर शोक्शो कथा आ अर्थ
मत्ती १३:१०-१७; लूका ८:९-१०

10 मिनु आ लोत्र नेंबपुकी गाक्मा नोले, येसु नु गाक्ब नु आ १२ जना शेंसीबपुकीमी कथा सेल्शा शेंशो लोत्र आ पर्बम हिल्लो पामे बाक्त।

11 मिनु येसुमी “परमप्रभु यावे आ राज्य दोदेशो बाकब दे इन कली रुप्तीक थुं गेशो बाकत। लाडगाम बाकब आन कली चहिं कथा सेल्शा शेनुडमी।

12 मारदे हना आन मिक्चीमी कोव्रनीम, तन्न मताइनीम। आन नोफामी नेंनीम तन्न मरुप्नीम। कोव्रशा रुप्तेक्म हना, आन थुं लेशशा, आन पाप क्याम्चा ताम वा” देमाकत। यसैया ६:९-१०

वांचेर शोक्ब आ पर्वम शेंशो
मत्ती १३:१८-२३; लूका ८:११-१५

13 मिनु येसुमी “मेको कथा आ अर्थ मरुप्नी? मेको लायो मरुप्नी हना, अरु कथा डा शेंतीक दोपा रुप्ने चाप्नीनी?

14 वांचेर शोक्बमी परमप्रभु यावे आ लोव्र शोक्ब।

15 लांमी शोक्शो दोदेशो बाकनीम देशा हना, लोव्र नेन्मेनु, सैतानमी आन थुंमी रुप्शो लोव्र योल्ब।

16 ग्याडग्रो खपीम शोक्शो खोदेशोपुकीमी लोव्र नेंशा, बिशशा ग्येरसीनीम।

17 तन्न शाकश थोक्चा मतथु, शुश मलीनीम। लोव्र आ पर्वम श्येत गेचा पुंडसाक्म हना, थु प्रोइशा गाकनीम।

18 चू आ दातेमी जुक्शो खोदेशोपुकीमी लोव्र नेंनीम।

19 तन्न दोपा ठेयब दुम्नुडा? दोपा क्येट चेमु? दोपा मारेइ मारेइ ताइनुडा? दे मिम्शा, आ थुंमी तेक्ब। मिनु आ नेंशो लोव्रमी फल मसिप्ब।

20 रिम्शो खपीम शोक्शो खोदेशोपुकीमी चहिं परमप्रभु यावे आ लोव्र नेंशा, आन थुंमी वोइक्नीम। मिनु गेडा का के ३०, ६० सहे का गेडा सम्म सिशशा ग्रेल्नीम” दे शेंदीमी बाकत।

परमप्रभु आ राज्य आ पर्वम शेंशो
लूका ८:१६-१८

21 मिनु येसुमी “मार, बत्ती पाथीमी गुप्शा वोइक्चा कली, खाट आगामी वोइक्चा कली दानीमी डा? मफारथु वोइक्नीमी, ममाइ डा? मत्ती ५:१५

22 खुइश्शो मखुइक्सीब, सुम्शा वोइश्शो यो हाक्सीब। मत्ती १०:२६-२७; लूका १२:२

23 सुइ के नेंब नोफा बाक्त हना, नेंनल” देंमाक्त।

24 मिनु येसुमी “गे मार नेंनी, मेको नोफा दाइश्शा नेनीने। दोपा नाक्शा गेनीनी, मोपा नाक्चा पुंडसीनीनी। मत्ती ७:२

25 मारदे हना थीब तेम्शा गेचा पुंडसीब, मथीबमी चहिं आइक्के बाक्शो यो रोइक्चा पुंडसीब” दे शेंदीमी बाक्त। मत्ती १३:१२-१३

26 मिनु “परमप्रभु यावे आ राज्य ओदेशो बाक्ब, मुर कामी आ रूमी वांचेर शोक्ब।

27 मिनु नाक्टो इप्ब, सुनी बोक्ब। शोक्शो वांचेर दोपा वाबा, दे मारेइ मतुइक्ब। याकूब ५:७

28 रू आंमा मेको वापाइक्ब। वाशा, बाला गूशा, आख सिप्ब।

29 तन्न मीमेनु, रिक्ब। मारदे हना रिक्ची जाक्शो बाक्ब” देंमाक्त।

तोरी वांचेर

मत्ती १३:३१-३२; लूका १३:१८-१९

30 मिनु “परमप्रभु यावे आ राज्य मार नु गारबा? दोदेशो कथा सेल्शा रुप्पाइक्नन्नी?

31 वांचेर नेल्ल आन क्येडा आइक्च तोरी गेडा बाक्ब।

32 तोरी गेडा वाशा, शुश राशी पाइश्शा गिग घांस आन क्येडा ठेयब रवा दुम्ब। मेको रवामी चिक्बीमी ग्योत्र सेल्शा, फाम्सीशा बाक्ने चाप्नीम। परमप्रभु यावे आ राज्य मेको खोदेशोन बाक्ब” दे शेंदीमी बाक्त।

33 मुरपुकीमी रुप्ने चाप्मेक्ल, दे शुश कथा सेल्शा, परमप्रभु यावे आ लोत्र शेंना शेंन बाक्माक्त।

34 कथा मसेल्थु, लोव्र मपाइबाक्माक्त। आ शेंसीब आन कली मेको कथा आन अर्थ यो नेल्ल रुप्पाइक्बाक्माक्त।

फश गिवार तेक्शो
मत्ती ८:२३-२७; लूका ८:२२-२५

35 मोपा शेने थुम्शा डा मिन, नां रिक्मेनु, येसुमी आ शेंसीब आन कली “समुन्द्र शोकशा, आइक्ची हांबु जाक्दीय्य” देंमाक्त।

36 मिनु देल्शो मुरपुकी नु ब्राशा, डोंगा का डोइश्शा, लमा बाक्त। अरु डोंगा का निक्शी यो लमा बाक्त।

37 मिनु लमानु, ठेयब फश गिवार पचा गोवा बाक्त। फश गिवार पवानु, ब्वाक्कु डोंगामी ओव्रशा, ग्रुम्चवा बाक्त।

38 येसु चहिं पिया थांडसीशा इप्शा निन्द्रा पवा बाक्त। शेंसीबपुकीमी “ए शेंब, गो नेल्ल ब्वाक्कुमी ग्रुम्शा बेक्चांइतय दे ममिम्तीनी?” देंशा सेंदमे बाक्त।

39 मिनु येसु बोक्शा, फश गिवार कली हुइश्शा, समुन्द्र कली “ब्वालेइ पावो, मदुक्को” देंमेनु, फश गिवार खा दिक्माक्त। मिनु सिक्सी दुम्माक्त।

40 मिनु शेंसीब आन कली “मारदे हिंनी? आं कली थमा मसुइक्नीनी?” देंमाक्त।

41 मेकोपुकी चहिं छक लाक्शा, शुश हिंशा “फश नु ब्वाक्कुमी यो आ लोव्र टीबाक्ताक्से। एको सु बाक्म माइ?” दे लोव्र पमुमा बाक्त।

5

वोल आन कली पोव्रम ओव्रचा गेशो
मत्ती ८:२८-३४; लूका ८:२६-३९

1 मिनु आइक्ची हांबु गेरासीनी आन रागी जाक्दीम्मा बाक्त।

2 मिनु डोंगा रे तोंइसीशा, येसुमी बेक्शो मुर थिम्तीके रे पिशो प्रांग्रा दिचा डा वोलमी ब्रीशो मुर का कली ग्रुमा बाक्त।

3 मेको मुर बेक्शो मुर थिम्तीकेमी बाक्बाक्माक्त। सुइमी मेको कली खिंमी वोइक्ने मचाप्मे बाक्त।

4 आ गुइ खोइली फ्रेंशा, साडलोमी पाइशशा वोदमेनु यो, साडलो प्रोइशशा प्रोक्बाक्माक्त। सुइमी मेको कली ग्राशा तेक्ने मचाप्बाक्मा बाक्त।

5 नाक्दो नाक्ती बेक्शो मुर थिम्तीके नु डांडामी हिरशा, वाइ ब्रेशशा, फुल्लुमी थोक्सीशा, तेस्सीशा, गार सेल्सी बाक्माक्त।

6 मेको मुरुमी येसु कली डोन रे तशा, दोरशा पिशा, सेउ पवा बाक्त।

7 मिनु ठेयब सेंदामी ग्रीशा “परमप्रभु यावे, नेल्ल क्येडा ठेयब आ तौ, गो निक्शी मार पमुसा डा? परमप्रभु आ नें थिशा, श्येत मगेयीनी दे पुंडनन्नी” देंमाक्त। मर्कूस १:२४

8 मारदे हना येसुमी वोल् कली “ए ग्रांशा दिचा डा वोल्, एको मुर रे गूडो” दे माइशशा बाक्माक्त।

9 मिनु “श्येत मगेयीनी, दे पुंडनन्नी” देंमेनु, येसुमी “इ नें मार में?” दे हिल्लो पवा बाक्त। मिनु मेकोमी “आं नें फौज बाक्ब, मारदे हना गो शुश बाक्नीकी” देंमाक्त।

10 मिनु “आंइ कली एको रागी रे मखेरचा नकी” दे पुना बाक्त।

11 मेको डांडामी शुश पोत्र जोन जोन बाक्शो बाक्मा बाक्त।

12 मोपतीके वोल्पुकीमी “मेको पोत्र गे लशा, आन रांमी ओत्रचा गेकी” दे पुन्मे बाक्त।

13 मिनु येसुमी लशा, ओत्रचा गेमी बाक्त। मिनु ग्रांशा दिचा डा वोल्पुकी मुर रे गूशा लशा, पोत्र आन रांमी ओत्रमा बाक्त। मिनु मेको हजार निक्शी पोत्रपुकी रोंगु रे यिना यिन, समुन्द्रमी गुम्शा बेक्मा बाक्त।

14 पोत्र योत्रबपुकीमी मो दुम्शो तशा, प्रोक्शा, सहर नु मेको रागीमी लोत्र ब्रपदमे बाक्त। मिनु मुरपुकीमी “मार दुम्मे? दो दुम्मे?” दे तुइक्थ जाक्मा बाक्त।

15 मिनु येसु आ नेक्था जाक्शा, डोंइती वोल्मी ब्रीशो मुर वा

फेक्शा, साशा, येसु नु निश्शो तामे बाक्त। मेको कली साशो तशा, हिंमा बाक्त।

16 मिनु आन मिक्चीमी तशो तुइक्बपुकीमी नक जाक्शो मुर आन कली मार मार दुम्मे, मेको नेल्ल शोत्रडमे बाक्त।

17 मिनु मुरपुकीमी येसु कली “आंइ रागी रे गूशा लने” देमा बाक्त।

18 मिनु येसु डोंगामी डोंइसेनु, डोंइती वोलम ब्रीशो मुरुमी “गे नु बाक्चा गेयीनी” दे पुना बाक्त।

19 मिनु येसुमी चहिं बाक्चा मगेथु “इ खिं लेशशा लशा, इ मुर आन कली प्रभुमी इ कली दोदेशो रिम्शो पवा, गिश शिशी कोंइदा तुइक्पतो” दे आ खिं सोइक्ता बाक्त।

20 मिनु लशा, आ खिंमी ला ममाइ, डेकापोलीस रागी नेल्ल हिरशा, येसुमी दोदेशो रिम्शो पवा शुश मुर आन कली तुइक्पदा बाक्त। मिनु नेंबपुकीमी “गिश रिम्शो दुम्माक्त” दे छक लाक्मा बाक्त। मर्कूस ७:३१

याइरस आ तमी

मत्ती ९:१८-२६; लूका ८:४०-५६

21 मिनु येसु डोंगा डोइश्शा, समुन्द्र शोक्शा, आइक्ची हांबु जाक्दीश्शा, समुन्द्र आ नेक्था बाक्माक्त। मिनु शुश मुर देल्मा बाक्त।

22 मिनु याइरस नें पाइश्शो गुम्तीक खिं डा ठेयब मुर का जाक्शा, येसु कली तशा, आ डोंइती बाप्शा, आ पोक्च थेक्शा

23 “आं तमी बेक्चा चिक्ताक्व। आं खिं लशा, इन गुइ आं आल आ तार वोतीने। मिनु आ रोइ साशा ब्रोंइब” दे पुना बाक्त।

24 मिनु येसु मेको नु लमाक्त।

मिनु शुश मुर मेको आ नोले खोइश्शा, हुल पा क्राक्शा लमा बाक्त।

25 मेको शुश मुर आन दातेमी १२ बर्स डोंइती रे हुश याप्शो रोइ पाइब मीश मुर का यो बाक्माक्त।

26 शुश डाक्टर आन कली कोंइशा यो, आ रोइ मसाशो बाक्माक्त। डाक्टर आन गुइ रे पा शुश श्येत जशो बाक्माक्त। आ रोइ चहिं मसाथु, डोंइती क्येडा सारो दुम्शो बाक्माक्त। आ बाक्शो मारेइ मारेइ यो नुप्शो बाक्माक्त।

27 मेको मीश मुरुमी “मेको येसु माइश्शो मुरुमी रोइ पशो आन कली सापाइक्ने चाप्ब” देशो लोव्र नेंशो बाक्माक्त। मिनु शुश मुर आन दातेमी ओव्रशा, नोले रे पा येसु आ फेक्शो वा थिवा बाक्त।

28 मारदे हना “आ फेक्शो वा थिचा ला ताता हना यो, सानुड” दे मिम्शो बाक्माक्त।

29 मिनु थिवानु, आ हुश याप्चा देक्माक्त। मिनु साडा बाक्त दे तुइक्ता बाक्त।

30 येसुमी आइक्के सापाइक्तीक सक्ति गूशो तुइश्शा, फिर लेश्शा कोव्रशा “सुम आं फेक्शो वा थिवा?” दे हिल्लो पवा बाक्त। लूका ६:१९

31 मिनु शेंसीबपुकीमी “मिश डा मुरुमी इन कली नेप्नीम। मिनु गे ‘सुम थियी’ देंनीनी?” देंमा बाक्त।

32 येसुमी चहिं एर ओंथ नेल्ल मिक्च हिरशा, सुम थियी दे तुइक्चा मला बाक्त।

33 मिनु मीश मुरुमी हिंशा खिंखि पा पिशा, येसु आ डोंइती बाप्शा, पोक्च थेक्शा, लोव्र नेल्ल शोव्रडा बाक्त।

34 मिनु येसुमी “आं तमी, गे थमा सुइक्तीवी, मिनु इ रोइ साते। इ थुं नाइश्शा बाक्को। मुल सास डा सास बाक्को” देशा डा मिन सोइक्ता बाक्त।

35 मोपा येसुमी मीश मुर नु लोव्र पवानु, याइरस आ खिं रे जाक्शो मुरपुकीमी याइरस कली “इ तमी बेक्त। शेंब कली मारदे श्येत गेचा” दे मदमे बाक्त।

36 येसुमी मेको आन देशो मनेंखु पा, याइरस कली “महिनो। थमा सुइक्ना सुइक्न बाक्को” देंमाक्त।

37 मिनु आ नोले खोइक्ब आन कली लचा मगेथु, पत्रुस, याकूब

नु आ लोकब यूहन्ना आन कली ला काथा लदा बाक्त। मत्ती १७:१

38 मिनु जाक्दीशशा, रोंका पा डाक्ब मुर शुश तवा बाक्त।

39 मिनु खिं ओव्रशा, डाक्ब आन कली “मारदे रोंका पा डाक्नीनी? मेको आल बेक्शो ममाइ, इप्शा बाक्शो बाक्ब” देंमाक्त। यूहन्ना ११:११

40 मिनु मेकोपुकीमी आ देशो थमा मसुदमे बाक्त। “हत्तै, दोदेशो लोव्र पवा” देंमानु, येसुमी मेको आन कली गुंडीमी बाक्त। मिनु आल आ आंम आफ नु आ शेंसीब आन कली आल आ बाक्तीके ओइदा बाक्त।

41 मिनु आल आ गुइ ग्याइशशा “तालीता कूमी” देंमाक्त। मेको लोव्र आ अर्थ “ए आल, बोक्को” देशो रुम्सीब। लूका ७:१४; प्रेरित ९:४०

42 मिनु आल छुल बोक्शा, एर ओंथ हिरसे बाक्त। मेको आल १२ बर्स डा बाक्माक्त। मिनु मेकेर बाक्बपुकी मोदेशो दुम्शो तशा, थाम्पा छक लाक्मा बाक्त।

43 मिनु येसुमी “सुइ आन कली मशेंचा। आल कली जचा गेसे” दे आम आफ आस कली देंमाक्त।

6

मुरपुकीम येसु कली थमा मसुइशशा

मत्ती १३:५३-५८; लूका ४:१६-३०

1 मिनु मेकेर रे लशा, आ बाक्तीके सहरमी जाक्दीम्माक्त। आ शेंसीबपुकी यो खोइशशा लमा बाक्त।

2 मिनु नाइक्तीक नाक्त गुम्तीक खिं लशा, मुर आन कली शेंचा गोवा बाक्त। मिनु आ शेंशो नेंब शुशेमी छक लाक्शा “मेकोमी ओदेशो शेंचा ते रे शेंसे माइ? ओदेशो निप्स पाइशशा लोव्र पचा दोपा जोक्गा? मेको आ गुइ रे दोदेशो सक्ति पाइशशा गेय दुम्मे? यूहन्ना ७:१५

3 शी मुइब ममाइ डा? मरीयम आ तौ ममाइ डा? याकूब, योसेस, यहूदा नु सिमोन आन लोकब ममाइ डा? आ लोकबपुकी गोपुकी नु मबाक्नीमी डा?” दे आन थुं मनुशो लोत्र पमुमा बाक्त। यूहन्ना ६:४२

4 मिनु येसुम मो देंब आन कली “तेइ तेइ परमप्रभु यावे आ लोत्र पाइब आन कली ठेयब सेल्शा मान पाइनीम। आंम रागी डा नु आंम जात डा, आंम खिं डा मुरपुकीमी चहिं महिक्नीम” दे माइक्मी बाक्त।

5 मिनु का निक्शी रोइ पशो मुर आन कली आ गुइम थिशा सापाइक्चा डा लाक्शा, अरु सक्ति पाइश्शो गेय कौंइने मचबा बाक्त।

6 मिनु “थमा मसुइय्यीमी बाक्त” दे तुइश्शा, छक लाक्माक्त। मिनु एर ओंथ डा गाउं गाउंमी हिरशा, शेंना शेंन गाक्माक्त।

शेंसीब आन कली सोइश्शो
मत्ती १०:१,५; लूका ९:१-६

7 मिनु काबु आ १२ जना शेंसीब आन कली ब्रेश्शा, निनिक्शी पा शेंथ सोइक्चा गोवा बाक्त। शेंसीब आन कली वोल खेरतीक सक्ति गोवा बाक्त। लूका १०:१

8 मिनु “जचा थोत्रक, क्येट, झोला मारेइ मलाइक्चा। कोक्के कुरशा,

9 जुत्ता लिक्शा, फेक्तीक वा का ला फेक्शा गाक्कीन।

10 गाउं सहर जाक्दीश्शा, खिं कामी ओत्रशा, बास बाक्कीन। मेको गाउं सहर रे गाक्ची मजाक्म सम्म बाक्कीन। खिं खिं याक्शा मबाक्कीन।

11 इन कली बाक्चा मगेथु इन शेंशो लोत्र यो मनैतेक्म हना, इन खोइली डा फुरक थुर थुर पाइश्शा गाक्कीन। इन मो पशोमी मेको आन कली चिन्ड दुम्ब” दे माइश्शा सोइक्तीमी बाक्त।

12 मिनु शेंसीबपुकी लशा, मुर आन कली “इन थुं परमप्रभु यावे गे लेत्तीन” दे नेंपाइक्ना पाइक्न गाक्मा बाक्त।

13 मिनु वोल आन कली गुंडशा खेरबाक्मा बाक्त। रोइ पशो मुर आन कली तेल खेक्शा, प्रार्थना पा सापाइक्बाक्मा बाक्त। याकूब ५:१४-१४

यूहन्ना कली साइशो

मत्ती १४:१-१२; लूका ९:७-९; लूका ३:१९-२०

14 मिनु हेरोद पिपमी मेको लोत्र नेंना बाक्त। मारदे हना येसु आ नें तेइ तेइ ब्रशो बाक्माक्त। का निक्शी मुरपुकीमी “ब्वाक्कुमी खुम्शा गुंडब यूहन्ना बेक्शो रे सेंचा पुंडसे बाक्त। मोपतीके सक्ति पाइशो गेय पाइबाक्माक्त” देंबाक्मा बाक्त।

15 का निक्शीमी “एलीया बाक्माक्त” देंबाक्मा बाक्त। का निक्शीमी “साइ डा परमप्रभु यावे आ लोत्र पाइब आन दाते डा का, माइ” देंबाक्मा बाक्त।

16 हेरोद पिपमी मोदेशो लोत्र नेंशा “गो आ पिया क्योरपाइशो यूहन्ना बेक्शो रे सेंचा पुंडसे बाक्त” देंमाक्त।

17 हेरोदमी हरोदनी कली ग्येरपाइशा, यूहन्ना कली ग्याइक्पाइशा, जेल्खानमी चोक्पाइशा वोइशो बाक्माक्त। मारदे हना हेरोदमी आ लोकब फिलीप आ मीश लाइशो बाक्माक्त।

18 मिनु यूहन्नामी हेरोद कली “इन लोकब आ मीश लाइक्चा मदुम्ब” दे माइशो बाक्माक्त। प्रस्थान २०:१४; लेवी १८:१६

19 मोदेशो आ पर्बम हेरोद आ मीशेमी चुरशा, यूहन्ना कली साइक्पाइक्चा माल्शो बाक्माक्त।

20 तन्न साइक्पाइक्चे मचाप्शो बाक्माक्त। मारदे हना हेरोद पिपमी “यूहन्ना ठीक पाइब नु रिम्शो थुं पाइशो मुर बाक्ब” दे तुइशा, यूहन्ना क्येडा हिंबाक्माक्त। मोपतीके साइक्चा मगेथु वोइशो बाक्माक्त। मिनु यूहन्ना आ लोत्र नेंनें दाक्शा, आ थुं ग्येत्थ लुकच दुम्शा, नोफा दाइशा नेंबाक्माक्त।

21 काबु मार दुम्माक्त देशा हना, पिप आ जरमेशो नाक्ती मिम्चा कली हेरोद पिपमी आ दरवार डा गेय पाइब, सरकार डा गेय पाइब

नु गालील डा ठेयब मुर नेल्ल आन कली ब्रेशशा, ठेयब भोज का
गेवा बाक्त।

22 मिनु हेरोदनी आ तमीमी सिल कोंइदा बाक्त। मिनु हेरोद नु
मेकेर खुम्सीशा बाक्बमी मेको सिल पशो तशा, शुश दाक्शा, नेल्ल
ग्येरसमा बाक्त। मिनु पिपमी मेको मीश आल कली “इ दाक्शो पुनो।
गो मेको गेनन” देंमाक्त।

23 मिनु लोत्र थोकशा “मार पुंइतीवी हना यो, इ पुंइशो नेल्ल गेनन।
राज्य उइक्थ उइक्थ पा योक्शा यो गेनन” दे कसम जशा, लोत्र गेवा
बाक्त। एस्तर ५:३-६

24 मिनु मीश आल गूशा, आ ममा कली “मार पुनु माइ” दे हिल्लो
पवानु, आ ममामी “ब्वाक्कुम खुम्शा गुंइब यूहन्ना आ पिया गेचा
नड, दे पुनो” देंमाक्त।

25 मिनु मीश आल फ्रा लेशशा, ओत्रशा पिप कली “ब्वाक्कुम
खुम्शा गुंइब यूहन्ना आ पिया थालमी कुर पा गेयीनी” दे पुना बाक्त।

26 मेको आ पुंइशो नेंशा, पिप आ थुं शुश खाइक्माक्त। तन्न
मेकेर बाक्ब आन कुल कसम जशा डा मिन “इ पुंइशो गेनन” देंतीके
“मगेनन” देंने मचबा बाक्त।

27 मोपतीके सिपाइ का कली “लशा, यूहन्ना आ पिया क्योरशा
चाक्को” दे सोइक्ता बाक्त।

28 मिनु आ पिया थालम कुर पा चाक्शा, मीश आल कली गेवा
बाक्त। मिनु मीश आलमी आ ममा कली गेवा बाक्त।

29 मिनु यूहन्ना आ शेंसीबपुकीमी “यूहन्ना साइक्चा पुंइसे
बाक्त” देंशो नेंशा, जेल्खानमी लशा, आ बेक्शो रां लाइशशा,
थिम्मे बाक्त।

शुश मुर आन कली रूथ्री थुल्शो

मत्ती १४:१३-२१; लूका ९:१०-१७; यूहन्ना ६:१-१३

30 येसु आ सोइशोपुकी लशा शेंशा, लेशशा जाक्मा बाक्त। मिनु
मार पामे, मार शेंदमे, मेको लोत्र येसु कली शोत्रडमे बाक्त। लूका
९:१०; लूका १०:१७

31 मिनु येसुमी “मुर मबाक्तीके लशा नाइसय” देंमाक्त, मारदे हना शुश मुर गुमथ जाक्बाक्मा बाक्त। मिनु येसु नु आ शेंसीबपुकीमी जचा कली यो नाइक्चा मतामे बाक्त।

32 मिनु डोंगा डोइश्शा, समुन्द्र शोकशा लमा बाक्त। मुर मबाक्तीके जाक्दीश्शा, नाइक्चा, दे थुं पामे बाक्त।

33 तन्न शुश मुरुमी येसु नु आ शेंसीब आन कली लशो तुइश्शा, डोंगाम डोइश्शो तशा, आइक्ची हांबु गे लमा बाक्त दे तुइश्शा, समुन्द्र हिरशा, दोरशा जाक्दीम्मा बाक्त।

34 मिनु येसु डोंगा रे तोइसीशा, शुश मुर देल्शा बाक्शो तशा, शिशी पवा बाक्त। मारदे हना मेको आन कली गोठला मपाइश्शो भेडा खोदेंशो दुम्शो तामी बाक्त। मिनु शुश लोत्र शेंचा गोवा बाक्त। मत्ती ९:३६

35 मिनु शेंस डा शेंस पवानु, नां रिक्चवा बाक्त। मिनु शेंसीबपुकीमी येसु कली “मुर मबाक्तीके बाक्ब, नां रिक्चाप्तु।

36 एको देल्शो मुर आन कली सोइक्चा। मारदे हना गाउं सहर लशा, आंम कली जचा थोत्रक ग्याप्मेक्ल” दे मदमेनु, मर्कूस ८:१-९

37 येसुमी “गेपुकीमी एको आन कली जचा गेने” दे माइक्मी बाक्त। मिनु शेंसीबपुकीमी “गेपुकी लशा, सहे निक्शी देनार खोइ डा शोब्ले ग्याप्शा, चाक्शा, थुल्चा देंनी?” दे हिल्लो पामेनु, देनार का नाक्त का डा गाल्च बाक्त। मेको रोम डा चांदी के क्येट बाक्त।

38 “शोब्ले दोशो कुरनी? कोत्रथ लने” देंमाक्त। मिनु कोत्रशा “शोब्ले ५ ओटा नु डांइ निक्शी बाक्त” देंमा बाक्त।

39 मिनु येसुमी मुर आन कली गिग घांस बाक्तीके दिंममी “लस्कर पा निप्पतीन” दे माइक्मी बाक्त।

40 मिनु सहे, सहे नु ५०, ५० डा लस्कर पा निस्समा बाक्त।

41 मिनु येसुमी शोब्ले नु डांइ शेशा, सरीड गे कोत्रशा “परमप्रभु गे रिम्शो पाइब बाक्नीनी” देंशा, शोब्ले जिक्शा, निप्पाइश्शो मुर आन कली “योक्शा गेने” दे आ शेंसीब आन कली गेवा बाक्त। डांइ यो योक्पाइक्मी बाक्त। मर्कूस ७:३४

42 मिनु नेल्लेमी रूथ्री जामे बाक्त ।

43 मिनु जशा, हेंशो शोब्ले नु डांइ गुप्मेनु, १२ डालो ब्रीमाक्त ।

44 जाइबपुकी वोंइश मुर ला ५ हजार बाक्मा बाक्त ।

येसु ब्वाक्कु तार गाक्शो

मत्ती १४:२२-३३; यूहन्ना ६:१५-२१

45 मिनु येसुमी आ शेंसीब आन कली “आं डोंइती लशा, समुन्द्र शोक्शा, बेथसैदा सहरमी जाक्दीतीन” दे डोंगामी डोइक्पाइश्शा, सोइक्तीमी बाक्त ।

46 मिनु नोले प्रार्थना पथ डांडा डोंइसे बाक्त ।

47 मिनु नां रिक्मेनु, डोंगा समुन्द्रमी बाक्माक्त । येसु चहिं डांडाम बाक्माक्त ।

48 मिनु येसुमी आ शेंसीबपुकीमी श्येत जामे बाक्त, दे तुइक्ता बाक्त । मारदे हना फशेमी डोंगा तेक्गा बाक्त । मिनु नां सोत्रचावानु, येसु ब्वाक्कु तारी गाक्शा पिमाक्त ।

49 “मेको आन कली दाम पाइक्नुड” दे मिम्शा, पेट्चावानु, शेंसीबपुकीमी येसु कली ब्वाक्कु तारी गाक्शो तशा, वोल दाप्शा, हिंशा वाइ ब्रेम्मा बाक्त ।

50 मारदे हना नेल्लेमी तामे बाक्त । मिनु शुश हिंमा बाक्त । मिनु येसुमी मेको आन कली सेश्शा “महिनीन, गो नड, इन थुं बारपतीन” देंमाक्त ।

51 मिनु डोंगा डोंइसे बाक्त । मिनु फश गिवार दिक्माक्त । मिनु शेंसीबपुकी थाम्पा छक लाक्मा बाक्त । मर्कूस ४:३९

52 दोपा शोब्ले बारपदा, दे मारेइ ममिम्शो बाक्मा बाक्त । मारदे हना रुप्चा थुं मपाइबाक्मा बाक्त । मर्कूस ८:१७

रोइ पाइब आन कली सापाइश्शो

मत्ती १४:३४-३६

53 मिनु समुन्द्र शोक्शा, गेनेसरेथ जाक्दीम्मा बाक्त ।

54 मिनु डोंगा रे तोइसामानु, मुरपुकीमी येसु बाक्ब दे तुइक्तमे बाक्त ।

55 मिनु येसु ते ते लमे, मेक मेक दोरशा लशा, रोइ पशो आन कली कुरशा, आ नेक्था चाक्मे बाक्त।

56 येसु गाउं सहर ते ते लमे, मेक मेक रोइ पशो आन कली चाक्बाक्मा बाक्त। मिनु येसु कली “इन फेक्शो वा थिचा गेयीनी” दे पुंइबाक्मा बाक्त। मिनु सु सुमी आ फेक्शो वा थीमे, मेकोपुकी साबाक्मा बाक्त। मर्कूस ५:२७-२८; प्रेरित ५:१५; प्रेरित १९:११-१२

7

साइ डा पतीके आ पर्बम शेंशो

मत्ती १५:१-२०

1 फरिसीपुकी नु सास्त्री का निक्शी यरूसलेम रे यिशा, येसु आ बाक्तीकेम जाक्मा बाक्त।

2 मिनु काथा बाक्मानु, येसु आ शेंसीबपुकीमी गुइ मचिक्थु जशो तामे बाक्त।

3 फरिसी नु यहूदी नेल्लेमी गुइ मचिक्थु मजाइनीम। आन जोक्ब तुइक्ब खाल्पापुकीमी वोइश्शो पतीके नेल्ल पाइनीम।

4 बजार लशा लेशशा, खिं जाक्शा, चोव्रखेसीशा ला जाइनीम। कचौरा, लोटा, गाग्री, निल्तीके नेल्ल चोव्रखेचा माल्ब। मेको मोदेंशो पतीके शुश पाइनीम। मत्ती २३:२५

5 मोपतीके येसु आ शेंसीबपुकीमी गुइ मचिक्थु जशो तशा, येसु कली “इन शेंसीबपुकीमी किकी पिपीमी वोइश्शो रिती थिती मारदे मपाइनीमी? मचोव्रखेसीथु गुइ मचिक्थु जाइबाक्तेकम” दे मदमे बाक्त।

6 मिनु येसुमी मेको आन कली “गे कपटीपुकी, यसैयामी पशो नोले दुम्ब लोव्र इन कली गारमाक्त। मार ब्रेक्शो बाक्त देंशा हना ‘मेकोपुकीमी शोव्र रे पा ला आं कली मान पाइनीम। आन थुंमी चहिं मदाक्नीम, आं देंशो यो मपाइनीम। यसैया २९:१३

7 आं कली सेउ पखु पा, परमप्रभु यावे आ लोव्र बाक्त, दे शेंनीमी, तन्न मुरुमी मिम्शो ला शेंनीम’ दे ब्रेक्शो बाक्त। यसैया २९:१३

8 परमप्रभु यावे आ अरेशो लोव्र प्रोंइशा, मुरुमी वोइश्शो पतीके पाइनीनी” दे माइक्मी बाक्त।

9 मिनु लोव्र बोइश्शा “गिश जोक्ब तुइक्ब ननी। परमप्रभु यावे आ देंशो शेंचा प्रोंइशा, आंम सेल्शो इन पतीके ला शेंनीनी।

10 मौसामी ब्रेक्शो लोव्र का ‘आम आफ आस कली मान पचा’ मिनु लोव्र का ‘सु सुमी आम आफ आस कली मरिम्शो लोव्र पामे, मेकोपुकी साइक्चा पुंडसमल’ दे ब्रेक्शो बाक्त। प्रस्थान २०:१२; प्रस्थान २१:१७

11 गेपुकीमी चहिं सुमी आम आफ आस कली ‘इन कली गेचा माल्शो थोव्रक लाइश्शा, कुरबन कली गेता’ दे माइक्बा, मेकोमी आम आफ आस कली मारेइ गेचा ममाल्ब दे शेंनीनी। ‘कुरबन गेता’ देंशो चहिं ‘परमप्रभु कली गेता’ देंशो रुम्सीब।

12 मोपा इन शेंतीक लोव्रमी आम आफ आस कली वारच पचा तेक्नीनी।

13 इन वोइश्शो रिती थितीमी परमप्रभु यावे आ देंशो टिचा प्रोंइपाइक्नीनी। मिनु मोदेंशो कपटी गेय शुश पाइनीनी” दे हुइक्तीमी बाक्त।

ग्रांग्रा दिशो सेल्ब थोव्रक

14 मिनु येसुमी मुर आन कली लेंशा ब्रेश्शा “गे नेल्लेमी नोफा दाइश्शा नेंशा रूपीने।

15 लाडगा रे ओव्रशो थोव्रकीमी मुर कली ग्रांग्रा दिशो सेल्ने मचाप्ब। मुर रे ग्रूशो थोव्रकीमी चहिं मुर कली ग्रांग्रा दिशो सेल्ब। प्रेरित १०:१४-१५

16 सु के नेंब नोफा बाक्मे, मेकोमी नेंनल” दे शेंदीमी बाक्त। मर्कूस ४:२३

17 मिनु मुर आन कली प्रोंइशा, खिं ओव्रमेनु, आ शेंसीबपुकीमी “इन शेंशो लोव्र थमा पा मार रुम्सीबा?” दे हिल्लो पामे बाक्त।

18 मिनु येसुमी “मार, गे यो एको लोव्र मरुप्नी? लाडगा रे ओव्रशो थोव्रकीमी मुर कली ग्रांग्रा दिशो सेल्ने मचाप्ब,

19 मारदे हना मुर आ थुंमी मओव्रब। आ कोव्रजीम ओव्रशा ग्रिम्शा, कयी लां पा गूब, दे मतुइक्नीनी?” दे शेंदीमी बाक्त। मो देंशोमी जचा थोव्रक नेल्ल ग्रांग्रा मबाक्नीम, दे शेंदा बाक्त।

20 मिनु मेकोमी “मुर रे मार गूबा, मेकोमी मुर कली ग्रांग्रा दिशो सेल्ब।

21 मुर आ थुं रे दोदेंशो ग्रांग्रा दितीके गूब देंशा हना, तेल्लेम पचा, खुइ पचा, साइक्चा,

22 ग्युंभे पशो मुर अर्को नु इप्चा, शिम पचा, जोल पचा, गेहे पचा, नें तोक्चा, ठेयब लेत्चा, ममिम्थु गेय पचा।

23 मोदेंशो पतीके मुर आ थुंम बाक्ब। मेको गूशा, मुर कली ग्रांग्रा दिशो सेल्ब” दे शेंदीमी बाक्त।

सुरोफोनीसीया डा मीश मुर

मत्ती १५:२१-२८

24 मिनु बोक्शा, मेकेर रे टायर नु सीदोन गे लशा, खिं का ओव्रमाक्त। सुइमी मतुइक्तमेक्ल देंत हना यो, खुइश्शा बाक्ने मचबा बाक्त।

25 मिनु ग्रांग्रा दिचा डा वोल्म सुम्शो आइक्च आल आ ममामी “येसु जाक्माक्त” देंशो नेंशा, येसु आ बाक्तीके जाक्दीम्माक्त।

26 मेको मीश मुर अर्को रागी डा, सुरोफोनीसीयामी जरमेशो डा बाक्माक्त। मिनु मेको जाक्शा, येसु आ डोंइती खुम्की पा बाप्शा “आं तमी रे वोल् गुंइदीने” दे पुना बाक्त।

27 मिनु येसुमी “डोंइती आल आन कली थुल्चा माल्ब। आल आन कली गेचा माल्शो शोब्ले कुचुम आन कली गेचा मदुम्ब” दे मदा बाक्त।

28 मिनु मेको मीश मुरुमी “मदुम्ब, प्रभु, तन्न कुचुमपुकीमी यो आलपुकीमी तोक्शो शोब्ले जचा ताइनीम” देंमाक्त।

29 मिनु येसुमी “इ मो देंतीके इ पुंइशो गेतन। वोल् इ तमी रे गूत” दे मदा बाक्त।

30 मिनु आ खिं लेशशा जाक्मेनु, वोल् गूशा, आल् सेस दुम्शा इप्शो बाक्माक्त।

नोफा मनेंब कली सापाइश्शो

31 मिनु टायर रे लेशशा, सीदोन नु डेकापोलीस सहर दाते लां पा लशा, गालील डा समुन्द्र जाक्दीम्माक्त। मत्ती १५:२९-३१; मर्कुस ५:२०

32 मिनु नोफा मनेंब मुर का चाक्शा “एको तार इन गुइ वोतीने” दे पुन्मे बाक्त।

33 मिनु येसुमी मेको नोफा मनेंब कली हुल रे फ्राशा लदा बाक्त। मिनु आ ब्रेप्चो मुर आ नोफामी ओंइशा, थुथु पा तोक्शा, नाक्चुकमी आ लें थिशा,

34 सरीड गे कोव्रशा, लाइश्शो सोक्त कीशा “हेफाता” दे मदा बाक्त। मेको चहिं “रोक्सो” देंशो रुम्सीब।

35 मिनु आ नोफा रोक्सीशा, नोफा नेंब दुम्माक्त। आ लें लोकसीशा, लोव्र पाइब दुम्माक्त।

36 मिनु “सुइ आन कली मशेंदीने” दे माइक्मी बाक्त। मशेंदीने माइक्मी बाक्त हना यो, मेकोपुकीमी तेइ तेइ शेंना शेंन गाक्मा बाक्त। मर्कुस १:४३-४५

37 मिनु आ लोव्र नेंबपुकी थाम्पा छक लाक्शा “मेकोमी नेल्ल रिम्शो सेल्बाक्त। नोफा मनेंब आन कली नोफा नेंब सेल्बाक्त। लोव्र पस मजोक्ब आन कली लोव्र पाइब सेल्बाक्त” देंमा बाक्त।

8

४ हजार मुर आन कली थुल्शो

मत्ती १५:३२-३९

1 मिनु लेंशा शुश मुर देल्शा बाक्शो बाक्मा बाक्त। मेकोपुकी नु मारेइ जचा थोव्रक मबाक्माक्त। मिनु येसुमी आ शेंसीब आन कली ब्रेश्शा

2 “एको आन कली शिशी पातामी। मारदे हना साबेर नाक्त रे मुल सम्म गो नु काथा बाक्शा, मारेइ जचा मतामे। मर्कूस ६:३४-४४

3 जचा मगेथु आन खिं खिं सोइक्ताकडमी हना, लांमी गाकना गाकन थाइनीम। का निक्शी शुश डोन रे जाक्शो बाक्नीम” देंमाक्त।

4 मिनु शेंसीबपुकीमी “ओदेशो गोरशो रागीमी इश डा मुर आन कली शोब्ले गेशा, दोपा रूपाइक्चा डा?” देंमा बाक्त।

5 मिनु येसुमी “शोब्ले दोशो कुरनी?” दे हिल्लो पवानु “७ ओटा” देंमा बाक्त।

6 मिनु मुर आन कली “निस्सीन” दे दिंममी निप्पपाइक्मी बाक्त। मिनु मेको ७ ओटा शोब्ले शेशा, परमप्रभु कली “गे रिम्शो पाइब बाक्नीनी” देशा, शोब्ले जिक्शा, शेंसीब आन कली गेशा, योक्पदा बाक्त। मिनु मेकोपुकीमी मुर आन कली गेमे बाक्त।

7 आइक्च डांइ का निक्शी यो बाक्माक्त। मेको डांइ यो शेशा “गे रिम्शो पाइब बाक्नीनी” देशा “योक्कीन” दे गेमी बाक्त।

8 मिनु मुरपुकीमी रूथी जामे बाक्त। जशा लीशो गुप्शा, ७ डालो प्रिंडमे बाक्त।

9 जाइबपुकी ४ हजार खोइ बाक्मा बाक्त। मिनु येसुमी मुर आन कली आन खिं खिं सोइक्ता बाक्त।

10 मिनु छुल छाल बोक्शा, आ शेंसीबपुकी नु डोंगा डोइश्शा, दल्मानुथा रागी जाक्दीम्मा बाक्त।

फरिसीमी चिन्ड कोव्रचा माल्शो

मत्ती १६:१-४

11 मिनु फरिसी जाक्शा, येसु आ थुं थाम्चा कली “सरीड डा चिन्ड का कोइदीकी” देंमा बाक्त। यूहन्ना ६:३०

12 मिनु येसुमी लाइश्शो सोक्त कीशा “सिनाक्त मुलाक्त डा मुरपुकीमी मारदे चिन्ड कोव्रचा माल्नीमी? नोफा दाइश्शा नेनीन, चिन्ड का यो मकोइन्नी” देंमाक्त।

13 मिनु मेको आन कली प्रोंइशा, डोंगा डोइश्शा, समुन्द्र शोक्शा, आइक्ची हांबु जाक्दीम्मा बाक्त।

फरिसी आन बोरब ओख्ती
मत्ती १६:५-१२

14 शेंसीबपुकीमी शोब्ले लाइक्चा प्रेंशो बाक्मा बाक्त। डोंगाम शोब्ले का ला लीशो बाक्माक्त।

15 मिनु येसुमी आ शेंसीब आन कली “नेनीने, फरिसीपुकी नु पिप हेरोद आन बोरपाइक्ब ओख्ती क्येडा होस पांइसीन” दे माइक्मी बाक्त। लूका १२:१; मर्कूस ३:६

16 मिनु “शोब्ले कुरचा प्रेंदमे बाक्त, दे तुइश्शा, मो देंम कों?” देंमुमा बाक्त।

17 मिनु येसुमी आन लोत्र तुइश्शा “शोब्ले मबा दे मारदे शुश लोत्र पाइनीनी? गे मुल यो मारेइ मरुप्नीनी? ममिम्नीनी? तुइक्चा यो ममाल्नीनी? मर्कूस ६:५२

18 मिक्च पाइश्शो बाक्तीनी हना यो, मताइनीनी? नोफा पाइश्शो बाक्तीनी हना यो, मनेनीनी? मुल यो मारेइ मिम्ने मचाप्नीनी? मत्ती ११:१३, १६

19 गोम ५ ओटा शोब्ले जिक्शा योक्शा, ५ हजार मुर आन कली थुलुनु, जशा लीशो गिश डालो प्रिंदीनी?” देंमेनु “१२ डालो” देंमा बाक्त। मर्कूस ६:४१-४४

20 “मिनु ७ ओटा शोब्लेमी ४ हजार मुर आन कली थुलुनु, जशा लीशो गिश डालो प्रिंदीनी?” देंमेनु “७ डालो” देंमा बाक्त। मर्कूस ८:८-९

21 मिनु “मुल यो मारेइ मरुम्नी?” देंमाक्त।

मिक्च मताइब कली सापाइश्शो

22 येसु नु आ शेंसीबपुकी बेथसैदा जाक्दीम्मा बाक्त। मिनु मुरपुकीमी मिक्च मताइब का चाक्शा “मेको कली थिने” दे पुन्मे बाक्त। मर्कूस ६:५६

23 मिनु येसुमी मिक्च मताइब कली गुइमी ग्याइश्शा डा मिन, कीशा गाउं रे ग्रुंइशा लदा बाक्त। मिनु आ मिक्चीम थुथु पा तोक्शा,

आ गुइ आ तारी वोइशशा “मुल मार मार तवी?” दे हिल्लो पवा बाक्त। यूहन्ना ९:६

24 मिनु मेकोमी इर गे कोव्रशा “मुरपुकी गाक्शो ताता, तन्न मेको मुरपुकी रवा खोदेंशो तांडसाक्म” देंमाक्त।

25 मिनु लेंशा आ गुइ आ मिक्च तारी वोदा बाक्त। मिनु मेकोमी कोव्रस डा कोव्रस पा तवा बाक्त।

26 मिनु येसुमी “गाउं हेरशा, इ खिं लावो” दे सोइक्ता बाक्त।

ख्रीस्तमी श्येत जचा माल्ब, दे शेंशो

मत्ती १६:१३-२०; लूका ९:१८-२१; यूहन्ना ६:६७-६९

27 येसु नु आ शेंसीबपुकी सिजरिया फिलिप्पी गे लमा बाक्त। मिनु लांमी गाक्मानु, येसुमी “मुरपुकीमी आं पर्वम मार देंनीमी?” दे हिल्लो पवानु,

28 “का निक्शीमी ‘ब्वाक्कुम खुम्शा गुंडब यूहन्ना बाक्माक्त’ देंनीम। का निक्शीमी ‘एलीया बाक्माक्त’ देंनीम। का निक्शीमी ‘परमप्रभु यावे आ लोव्र पाइब का बाक्माक्त’ देंनीम” दे मदमे बाक्त। मर्कूस ६:१५

29 मिनु येसुमी “गेपुकी चहिं आं कली सु सुइय्यीनी?” दे हिल्लो पवानु, पत्रुसमी “गे ख्रीस्त बाक्नीनी” देंमाक्त।

30 मिनु आ शेंसीब आन कली “एको ख्रीस्त बाक्ब, दे सुइ आन कली मशेंदीन” दे माइक्मी बाक्त। मर्कूस ९:९

साइक्चा पुंडसीचा आ पर्वम शेंशो

मत्ती १६:२१-२३; लूका ९:२२

31 मिनु येसुमी आ शेंसीब आन कली “रागीम जरमेशोमी शुश श्येत जचा माल्ब। जोक्ब तुइक्ब खाल्पा, ठेयब चढेब नु सास्त्रीपुकीमी मेको कली मब्राइनीम, साइक्पाइक्नीम। मिनु बेक्शो आ नित्थ नाक्ती सेंसीब” दे लोव्र मखुइक्थु शेंदीमी बाक्त। मर्कूस ४:३१; मर्कूस १०:३२-३४

32 मिनु पत्रुसमी येसु कली एर आइक्ची लाइशशा, हुइक्ता बाक्त।

33 मिनु येसु हिरशा, अर्को शेंसीबपुकी गे कोव्रशा “ए सैतान, इ कुल मकोंइदी। परमप्रभु यावे आ मिम्शो ममाइ, मुर आन देंशो नेंबाक्ते” दे पत्रुस कली हुइक्ता बाक्त।

दोपा ख्रीस्त आ नोले खोइक्चा

मत्ती १६:२४-२६; लूका ९:२३-२७

34 मिनु आ शेंसीबपुकी नु मेकेर देल्शो आन कली ब्रेशशा “सुमी आं नोले खोइक्चा थुं पाइबा, मेकोमी आंम दला दाक्स पचा प्रोंइशा, श्येत जचा महिंथु, आं नोले खोइय्यील।

35 सुमी आंम कली प्रोंइचा माल्बा, मेको जाम्शा लाइब। सुमी आं पर्वम नु परमप्रभु यावे आ लोव्र आ पर्वम आंम कली जिम्मा गेबा, मेको ब्रोंइब। मत्ती १०:१९

36 रागी नेल्ल आंम के सेल्ले चाण्ब, तन्न बेक्त हना, मेको मार रिम्शो दुम्बा डा?

37 मारदे हना गे मार गेशा ब्रोंइने चाप्नीनी डा?

38 सुमी हेंथे गाक्ब नु पाप पाइब आन पालामी आं पर्वम नु आं लोव्र आ पर्वम मुर आन कली देंचा मुने पाइबा, मेको आ पर्वम रागीम जरमेशोमी यो आ आफ आ छेडछेड नु आ स्वर्ग डा गेय पाइबपुकी नु जाक्मेनु मेको कली तशा मुने पाइब” दे माइक्मी बाक्त। मत्ती १०:३३

9

1 मिनु “नोफा दाइशशा नेनीने, मुल गो नु काथा बाक्शो का निक्शीमी परमप्रभु यावे आ राज्य सक्ति पाइशशा जाक्शो मतामे सम्म मबेक्नीम” देंमाक्त।

येसु आ रां फाइशशो

मत्ती १७:१-१३; लूका ९:२८-३६

2 मिनु ६ नाक्त नोले येसुमी पत्रुस, याकूब नु यूहन्ना, सां आन कली सुइ मबाक्तीके डांडामी लदा बाक्त। मिनु मेको आन डोंइती येसु फांडसे बाक्त।

3 दोपा फांडसे बाक्त देंशा हना, आ फेक्शो वा बुबु पा जिलील बुश दुम्शो तामे बाक्त। मोदेशो बुश सुइमी सेल्ने मचाप्नीम।

4 मिनु एलीया नु मोसा गूशो तामे बाक्त। मेको निक्शीमी येसु नु लोव्रसी पाम्से बाक्त।

5 मिनु पत्रुसमी येसु कली “ए शेंब, इं कली एकेर बाक्चा रिम्शो दुम्ब। बाक्तीके सां सेल्य। इन कली का, मोसा कली का नु एलीया कली का सेल्य” देंमाक्त।

6 मारदे हना मार देंचा दे मतुइक्ता बाक्त। मिनु शुश हिंमा बाक्त।

7 मिनु गोस्सुमी नेल्ल आन कली गिल्मी बाक्त। गोस्स आगा रे सेंदा का गूशा “एको आं दाक्शो तौ बाक्ब। आ लोव्र नेनीने” देंशो नेन्मे बाक्त। मर्कूस १:११; २पत्रुस १:१७

8 मिनु एर ओथ कोव्रडमेनु, येसु ला तामे बाक्त।

9 मिनु डांडा रे ब्रुम्मानु, येसुमी “रागीम जरमेशो बेक्शो रे सेंचा मपुंडसे सम्म इन तशो सुइ आन कली मशेंदीने” दे माइक्मी बाक्त। मर्कूस ८:३०

10 मिनु मोदेशो दुम्शो सुइ आन कली मशेंदमे बाक्त। “बेक्शो रे सेंचा पुंडसीचा देंशो मार बाक्म माइ” दे हिल्लो पमुमा बाक्त।

11 मिनु आ शेंसीबपुकीमी येसु कली “डोंइती एलीया जाक्चा माल्ब, दे सास्त्रीपुकीम शेंनीम। मारदे मोदें शेंनीमी?” दे हिल्लो पामेनु,

12 येसुमी “एलीया डोंइती जाक्शा, नेल्ल ठीक सेल्ब। मिनु रागीम जरमेशो श्येत जाइब नु महिक्सीशो दुम्ब, दे ब्रेक्शो बाक्बा, ममाइ डा? मलाकी ३:१३; यसैया ५३:३-५

13 एलीया डोंइती जाक्त। मिनु आ पर्बम डोंइती ब्रेक्शो खोदेशो दुम्शा, मेको कली मार पचा दाक्तमे, मेको पाम्तेक्म” दे शेंदीमी

बाकत। मत्ती ११:१४; १राजा १९:२-१०

वोलम तशो आल सापाइशशो

मत्ती १७:१४-२०; लूका ९:३७-४२

14 मिनु अरु शेंसीब आन बाक्तीकेमी लेशशा जाक्शा, शुश मुर देल्शो नु सास्त्रीपुकीमी लीशो शेंसीब आन कली लोत्र हिल्लो पशो तामे बाकत।

15 मिनु देल्शो मुरपुकीमी येसु कली तशा, छक लाक्शा, दोरशा पिशा, येसु कली सेउ पदमे बाकत।

16 मिनु येसुमी “मेकोपुकी नु मार लोत्रसी पनी” दे हिल्लो पवानु,

17 देल्शो मुर आन दाते डा कामी “ए शेंब, आं तौ एक चाक्ता, मारदे हना वोल्मी तशा, लाटा दुम्शो बाक्ब।

18 वोल्मी सुमानु, गोल्ब। आ शोत्र रे बोग्यो गुंडब। आ खुइ शेप्ब। मिनु आ रां मदुक्ब दुम्ब। इन शेंसीब आन कली ‘वोल गुंडदीन’ दे पुंडता, तन्न वोल् गुंडने मचबेम” देंमाकत।

19 मिनु येसुमी “गे थमा पा थमा मसुइक्बपुकी, गेना सम्म गेपुकी नु बाक्नुडा डा? ओदेशो इन पशो गेना सम्म फाल्शा बाक्नुडा डा? रोइ पाइब कली चाक्कीन” दे माइक्मी बाकत।

20 मिनु वोंइश आल कली येसु आ डोंइती चाक्मे बाकत। मिनु वोल्मी येसु कली तवानु, आल तिड गोल्शा, रोम्सीशा, आ शोत्र रे बोग्यो गुंडदा बाकत।

21 मिनु येसुमी आ आफ कली “गेना रे ओदेशो दुम्शो?” दे हिल्लो पवानु, आ आफोमी “आइक्च रेन,

22 एको वोल्मी साइक्चा कली मीमी दुप्पदानु, ब्वाक्कुमी ग्रुम्पदानु, शुश खेयप हेर हेरा बेकत। गे मारेइ पने चाप्नीनी हना, शिशी पा एको श्येत जचा रे प्रोंइयीकी” देंमाकत।

23 मिनु येसुमी “गे मारेइ पने चाप्नीनी कों देंनीनी। तन्न सु सुमी गेन चाप्नीनी देंशा, थमा सुइक्नीमी, मेकोपुकीमी आन पुंडशो ताइनीम” देंमाकत।

24 मिनु आल आ आफोमी “थमा सुइक्ता, आं थमा मसुइक्ब थुं कली थमा सुइक्पतीने” दे थुं खाइश्शा, डाक्शा देंमाक्त।

25 मिनु येसुमी शुश मुर आन कली एर ओंथ रे जाक्शो तशा, ग्रांग्रा दिचा डा वोल कली “गे लाटा नु नोफा मनेब वोल, गेनायो लेंशा मओव्रचा डा पा गूशा लावो” दे हुइश्शा, खेरा बाक्त।

26 मिनु वोल वाइ ब्रेश्शा, आल कली रोप्पाइश्शा गूमाक्त। मिनु आल बेक्शो खोदेशो दुम्माक्त। मुरपुकीमी “बेक्त” देंमा बाक्त। मर्कूस १:२६

27 मिनु येसुमी आल आ गुइ ग्याइश्शा पोक्गानु, राम्माक्त।

28 मिनु येसु नु आ शेंसीबपुकी खिं लमा बाक्त। मिनु शेंसीबपुकीमी “मारदे मेको वोल कली गुंइने मचाप्का?” दे हिल्लो पामे बाक्त।

29 मिनु येसुमी “ओदेशो वोल कली प्रार्थना पशा ला गुंइने चाम्सीब” दे माइक्मी बाक्त।

रागीम जरमेशो श्येत जचा माल्शो
मत्ती १७:२२-२७; लूका ९:४३-४५

30 मिनु मेकोपुकीमी “इं गाक्शो सुइम मतुइक्तमेक्ल” दे गालील लां पा गाक्मा बाक्त।

31 मारदे हना आ शेंसीब आन कली “रागीम जरमेशो दा मुर आन गुइमी गेशा, साइक्चा पुंइसीशा, आ नित्थ नाक्ती बेक्शो रे सेंसीब” दे शेंचा दाक्ता बाक्त। मर्कूस ८:३१; मर्कूस १०:३२-३४

32 शेंसीबपुकीमी चहिं आ शेंशो मरुप्मे बाक्त। मिनु हिल्लो पचा यो हिंमा बाक्त। लूका १८:३-४

नेल्ल क्येडा ठेयब सु बाक्बा
मत्ती १८:१-५; लूका ९:४६-४८

33 मिनु कापेरनाउम जाक्दीम्मा बाक्त। मिनु खिं का ओव्रशा, येसुमी आ शेंसीब आन कली “लांमी गाक्यानु, मार लोव्रसी पनी?” दे हिल्लो पवा बाक्त।

34 तन्न मेकोपुकी सिक्सी पामे बाक्त, मारदे हना लांमी गाक्मानु “नेल्ल क्येडा ठेयब सु बाक्या माइ?” दे लोत्र पशो बाक्मा बाक्त।

35 मिनु निश्शा, शेंसीब आन कली आ नेक्था ब्रेशशा “नेल्ल क्येडा डोंइती दुम्चा कली नेल्ल क्येडा नोले दुम्शा, नेल्ल आन गेय पाइब दुम्चा माल्ब” देंमाक्त। मर्कूस १०:४३-४४; मत्ती २९:११; लूका २२:२६-२७

36 मिनु आल का आन दातेमी चाक्शा, आल कली मुष्शा

37 “सुमी आं नेंमी ओदेंशो आल कली ब्राइबा, मेकोमी आं कली ब्राइब। आं कली ब्राइबमी आं कली ममाइ, तन्न आं कली सोइक्ब कली यो ब्राइब” दे माइक्मी बाक्त। मत्ती १०:४०

रिम्शो पचा मतेक्चा

लूका ९:४९-५०

38 यूहन्नामी येसु कली “ए शेंब, गोपुकी नु मगाक्ब मुर कामी इन नें थिशा, वोल आन कली खेरशो ताइतक। मिनु मो पचा मदुम्ब, दे माइक्तक” देंमाक्त। गन्ती १०:२७-२८

39 मिनु येसुमी “मदुम्ब, दे मदेंचा, मारदे हना आं नें थिशा, ठेयब गेय पाइबमी आं पर्वम लोत्र मक्याल्ब।

40 इं कली मरिम्शो मपाइब मेको इं मुरुन बाक्ब। मत्ती १२:३०; लूका ११:२३

41 नोफा दाइश्शा नेनीने, सुमी आं नें थिशा, ख्रीस्त आ मुर नम देंशा, इन कली लोटा का ब्वाक्कु तूचा गोबा, मेकोमी दोपा यो आ इनाम ताइब। मत्ती १०:४२

थमा सुइक्चा मतेक्चा

मत्ती १८:६-९; लूका १७:१-२

42 सुमी आं कली थमा सुइक्ब आइक्च आल आ थमा सुइक्तीक क्याल्बा, मेको कली आ शुरम यात क्युक्शा, समुन्द्रमी ताइश्शा साइक्चा रिम्शो बाक्ब।

43 इ गुइमी तेक्तु हना, मेको गुइ ख्रोतो। मारदे हना निम्फा गुइ पाइश्शो दुम्शा, गेनायो मकाप्ब नरक डा मीम ओत्रचा क्येडा, डुंडे

दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:३०

44 नरकमी बाक्ब आन लुस्पु मबेक्नीम, मी यो मकापब।

45 इ खोइलीमी तेक्तु हना, मेको खोतो। मारदे हना खोइली निम्फा पाइश्शो दुम्शा नरकम ओव्रचा क्येडा, खोरन्डे दुम्शा, परमप्रभु यावे आ राज्यमी ओव्रचा तचा रिम्शो बाक्ब।

46 नरकमी बाक्ब आन लुस्पु मबेक्नीम, मी यो मकापब।

47 इ मिक्चीमी तेक्तु हना, मेको मिक्च फेशशा ताइक्तो। मारदे हना मिक्च निम्फा पाइश्शो दुम्शा, नरकम ओव्रचा क्येडा, काना दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:२९

48 नरकमी बाक्ब आन लुस्पु मबेक्नीम, मी यो मकापब। यसैया ६६:२४

49 नेल्ल मीम याक्पाइक्चा पुंइसीनीम। मारेइ चढेमेनु, हिक्सी सुप्शो चढेनीम। लेवी २:१३; गन्ती १८:१९

50 हिक्सी डाम्ताक्व हना, ब्रोव्रब। हिक्सी आ डाम्तीक जाम्त हना, मारम डाम्पाइक्चा डा? हिक्सी डाम्शो दुमीन। मिनु दुशा बाक्कीन” दे शेंदीमी बाक्त। मत्ती ५:१३; लूका १४:१४; कलस्सी ४:६

10

1 मिनु मेकेर रे लशा, यहूदीया रागी नु यर्दन खोला आइक्ची हांबु जाक्दीम्मा बाक्त। मिनु लेंशा शुश मुर देल्मा बाक्त। मिनु तेइ तेइ गाक्शा, दोपा शेंदा, मोपा मेको आन कली यो शेंदा बाक्त।

वोंइश मीश आस नाता

मत्ती १९:१-९

2 मिनु फरिसीपुकी जाक्शा, आ थुं थाम्चा कली “मीश कली प्रोंइचा दुम्बा देय मदुम्बा?” दे हिल्लो पामे बाक्त।

3 मिनु येसुमी “मोसामी इन कली मार पन देमे?” देमेनु

4 “छोड पत्र ब्रेक्शा, सोइक्चा दुम्ब देंत” देंमा बाक्त। ब्यवस्था २४:१; मत्ती ५:३१-३२

5 मिनु येसुमी “मुरपुकीमी शिशी मपाइनीम, दे तुइशशा, मोदेशो पचा गेवा बाक्त।

6 नेल्ल क्येडा डोंइती परमप्रभु यावेमी वोंइश मुर नु मीश मुर सेलतीम्सी। उत्पत्ती १:२७

7 मोपतीके मुरुमी आम आफ प्रोंइशा, आ मीश नु गारशा बाक्ब। उत्पत्ती २:२४

8 मिनु मेको निक्शी रां का दुम्नीस। मोपतीके वोंइश मीश निक्शी मनसी, निम्फा का नस।

9 परमप्रभु यावेमी कांइचीक सेल्शो आस कली मुरुमी मफ्रादमेक्ल” दे माइक्मी बाक्त।

10 मिनु खिंमी बाक्मेनु, आ शेंसीबपुकीमी “इन शेंशो मार रुम्सीबा” दे हिल्लो पामे बाक्त।

11 मिनु येसुमी “सुमी आ मीश प्रोंइशा, अर्को चाक्बा, मेकोमी वोंइश मीश आस नाता खोइक्ब। लूका १६:१८; १कोरिन्थी ७:८-११

12 मीश मुरुमी आ वोंइश प्रोंइशा, अर्को खोइक्तु हना, मेकोमी यो वोंइश मीश आस नाता खोइक्ब” देंमाक्त।

येसु नु आलपुकी

मत्ती १९:१३-१५; लूका १८:१५-१७

13 मिनु येसुमी आ गुइ आल आन तारी वोदल दे आलपुकी चाक्मे बाक्त। मिनु शेंसीबपुकीमी आल चाक्ब आन कली “मचाक्कीन” दे हुइक्तमे बाक्त।

14 मिनु येसुमी मेको तशा, आ थुं मनुथु, हुइक्ब आन कली “आल आन कली आं बाक्तीके जाक्चा गेने, मतेक्कीन। मारदे हना परमप्रभु यावे आ राज्य आल आन केन बाक्ब।

15 नोफा दाइशशा नेनीने, मुरपुकीमी आल आन थुं डा मिम्शो खोदेशो पा ममिम्ताक्म हना, परमप्रभु यावे आ राज्यमी ओव्रचा मताइनीम” दे माइक्मी बाक्त।

16 मिनु आल आन कली मुष्शा, आ गुइ आन तारी वोइशशा, आसीक गेमी बाक्त।

शोंप आ पर्बम लोव्र
मत्ती १९:१-९

17 मिनु मेकेर रे लमेनु, मुर का दोरशा पिशा, येसु आ डोंइती पोक्च थेक्शा बाष्शा “शेंब, गे रिम्शो ननी। गेना हना यो ब्रोंइशा बाक्चा कली मार पचा माल्नुडा?” दे हिल्लो पवा बाक्त।

18 मिनु येसुमी “मारदे आं कली रिम्शो मुर दे माइय्यी? सुइ रिम्शो मनमी। परमप्रभु यावे ला रिम्शो बाक्ब।

19 परमप्रभु यावे आ अरेशो लोव्र तुइक्नेवे। मसाइक्चा, वोंइश मीश आस नाता मखोइक्चा, खुइ मपचा, सांकछी बाक्शोनु, जोल मपचा, हिंच कोंइशा मारेइ मरोइक्चा, आम आफ आस कली मान पचा, दे ब्रेक्शो बाक्ब” दे मदा बाक्त। प्रस्थान २०:१२-१७

20 मिनु मेकोमी “गो आल रेन मेको नेल्ल पन पन बाक्ती” देमेनु,

21 येसुमी मेको आ कुल शिरशा कोव्रशा, मेको कली दाक्शा “का चहिं मपवी। लशा, इ शोंप नेल्ल लेयशा, जचा फेक्चा मताइब आन कली योक्शा गेमी। मिनु लेशशा, आं नोले खोइय्यी। मिनु इ शोंप स्वर्गमी बाक्ब” देमाक्त। मर्कूस ८:३४; मत्ती १०:३८

22 मेको लोव्र नेंशा, आ कुल राव किकपाइशशा, आ थुं खाइशशा, गाक्माक्त। मारदे हना मेको शुश शोंप पाइशशो मुर बाक्माक्त।

23 मिनु येसुमी एर ओंथ कोव्रशा, आ शेंसीब आन कली “शुश शोंप पाइशशो मुर परमप्रभु यावे आ राज्य ओव्रचा गिश श्येत बाक्बा” देमाक्त।

24 मेको लोव्र नेंशा, शेंसीबपुकी छक लाक्मा बाक्त। मिनु येसुमी लोव्र थोक्शा “आलपुकी, आन शोंपोम थमा सुइक्ब आन कली परमप्रभु यावे आ राज्य ओव्रचा शुश श्येत दुम्ब।

25 शोंप पाइशशो मुर परमप्रभु यावे आ राज्य ओव्रने चाप्चा क्येडा, दलओंठ लूजे आ पोलाम ग्रीने चाप्ब” देंमाक्त।

26 मिनु शेंसीबपुकी थाम्पा छक लाकशा “मो हना, सु ओव्रचा ताइबा डा?” देंमुमा बाक्त।

27 मिनु येसुमी आन कुल गे कोव्रशा “मुरपुकीमी पने मचाप्नीम। तन्न परमप्रभु यावेमी पने चाप्ब, मारदे हना परमप्रभु यावेमी मारेइ मारेइ पने चाप्ब” दे माइक्मी बाक्त।

येसु आ नोले खोइक्ब आन इनाम

मत्ती १९:२७-३०; लूका १८:२८-३०

28 पत्रुसमी येसु कली “गो मारेइ मारेइ प्रोंइशा, इन नोले खोइक्तक” देंमेनु,

29 येसुमी “नोफा दाइशशा नेनीन, सुमी आं पर्वम नु ग्येरपाइक्ब लोव्र आ पर्वम आ खिं, लोकबम लोकब, आम आफ, तमी तौ नु रू प्रोंइबा,

30 मेकोमी खेदा पा श्येत जचा पुंइसाक्ब हना यो, मुल आ प्रोंइशो क्येडा शुश खिं, लोकबम लोकब, आम आफ, तमी तौ नु रू ताइब। मिनु नोले गेना हना यो परमप्रभु यावे नु बाक्चा ताइब।

31 डोंइती दुम्शोपुकी नोले दुम्नीम। नोले दुम्शोपुकी डोंइती दुम्नीम” दे शेंदीमी बाक्त।

रागीम जरमेशो साइक्चा पुंइसीब देंशो

मत्ती २१:१७-१९; लूका १८:३१-३४

32 मिनु यरूसलेम डा लां खोइशशा गाक्मानु, येसु नेल्ल आन डोंइती गाक्माक्त। आ नोले खोइक्बपुकी छक लाकशा हिंमा बाक्त। मिनु १२ जना शेंसीब आन कली लेंशा आ नेक्था ब्रेशशा, आ कली मार दुम्बा दे तुइक्पाइक्चा गोवा बाक्त। मर्कूस ९:११

33 मिनु “मुल यरूसलेम लाइनय। मिनु रागीम जरमेशो ठेयब चढेब नु सास्त्री आन गुइमी गेचा पुंइसीब। मिनु मेकोपुकीमी दोस गेशा, साइक्चा माल्ब, दे अर्को जात डा मुर आन गुइमी गेनीम।

34 मिनु मेकोपुकीमी शुक्शी पशा, आ कुलमी तोक्शा युक्नीम। मिनु साइक्नीम। मिनु बेक्शो आ नित्थ नाक्ती बेक्शो रे सेंसीब” दे तुइक्पाइक्मी बाक्त।

ठेयब सु बाक्बा?

मत्ती २०:२०-२८

35 मिनु जब्दी आ तौ याकूब नु यूहन्ना येसु आ नेक्था जाक्शा “ए शेंब, मार पुंइस्कु, मेको तस्कुल” दे पुन्से बाक्त।

36 मिनु येसुमी “मार पुंइनीसी?” दे हिल्लो पवानु,

37 मेको निक्शीमी “गे सक्ति पाइश्शो दुम्शा, हुकुम पाइब दुम्नीनु, का इन ग्युरा, का इन पेरा गे बाक्चा गेचा नस्कु” दे पुन्से बाक्त।

38 तन्न येसुमी “गे मार पुंइसी, मेको मरुप्नीसी। आं तूचा माल्शो कचौरा तूने चाप्नीसी? आं बुद पा श्येतम खुम्चा पुंइसीने चाप्नीसी?” देंमेनु मर्कस १४:३६; लूका १२:५०

39 “चाप्नस्कु” देंसा बाक्त। मिनु येसुमी “आं तूचा माल्शो कचौरा यो तूनीसी। आं बुद पा श्येतम खुम्चा यो पुंइसीनीसी। प्रेरित १२:२

40 तन्न आं ग्युरा पेरा गे बाक्चा गेचा चहिं आं गुइमी ममाइ। परमप्रभु यावेमी योत्रचा पुंइसीशो मुर ला मेकेर बाक्चा ताइनीम” दे माइक्सी बाक्त।

41 मिनु शेंसीब १० जनामी मेको आस कली मोदेशो पुंइशो तशा “याकूब नु यूहन्ना दोदेशो बाक्सा” दे आन थुं मनुथु, लोत्र पमुमा बाक्ते। लूका २२:२५-२७

42 मिनु येसुमी नेल्ल आन कली खुप्शा “अर्को जात डा मुर आन कली हुकुम पाइनुड, दे मिम्बपुकीमी मुर आन कली दिप्शा वोइश्शा, हुकुम पाइनीम, दे तुइक्नीनी।

43 तन्न इन दातेमी मोदेशो पचा मदुम्ब। सुमी ठेयब दुम्चा दाकबा, मेको नेल्ल आन गेय पाइब दुम्चा माल्ब।

44 सु नेल्ल क्येडा डोंइती दुम्चा दाकबा, मेको नेल्ल आन वाइल दुम्चा माल्ब। मर्कूस ९:३५; १पत्रुस ५:३

45 मारदे हना रागीम जरमेशो यो मान पपांइसीचा कली ममाइ, तन्न वारच पथ नु शुश मुर आन कली प्रोंइचा कली आ गिंगे गेथ जाकशो बाक्त” दे माइकमी बाक्त।

मिक्च मताइब बारतीमै

मत्ती २०:२९-३४; लूका १८:३५-४३

46 मिनु यरीको सहरमी जाकदीम्मा बाक्त। मिनु यरीको रे लशा, येसु नु आ शेंसीब आन नोले खोइश्शा, शुश मुर गाक्मानु, तिमै आ तौ मिक्च मताइब पुंइब बारतीमै मेको लां उइ बाकशो बाक्माक्त।

47 मिनु बारतीमैमी नासरथ डा येसु एको लां पिना पिन बाक्त देंशो नेंशा “ए येसु, दाऊद आ तौ, शिशी पाइय्यीनी” दे वाइ ब्रेत्चा गोवा बाक्त।

48 मिनु शुशेमी “सिक्सी पावो” दे हुइक्तमे बाक्त। आं चहिं डोंइती क्येडा शुश वाइ ब्रेश्शा “दाऊद आ तौ, शिशी पाइय्यीनी” दे ब्रेम्माक्त।

49 मिनु येसु खा दिक्शा “मेको कली एके ब्रेत्तीने” देंमाक्त। मिनु मिक्च मताइब कली “ठेयब थुं पावो। मिनु बोक्को। मारदे हना इ कली ब्रेत्ताक्व” दे मदमे बाक्त।

50 मिनु आ बरखी ताइश्शा, छुल बोक्शा, येसु आ डोंइती जाक्माक्त।

51 मिनु येसुमी “इ कली मार पड, मार पुंइनेवे?” दे हिल्लो पवा बाक्त। मिनु मिक्च मताइबमी “ए शेंब, मिक्च ताइब सेल्यीनी” दे पुना बाक्त।

52 मिनु येसुमी “साशा लावो। इ थमा सुइश्शोमी साते” दे मदानु, ब्रा साशा मिक्च ताइब दुम्शा, येसु आ नोले खोदा बाक्त।

11

येसु यरूसलेमम जाकदीशशो

मत्ती २१:१-११; लूका १९:२९-४०; यूहन्ना १२:१२-१९

1 मिनु यरूसलेम आ नेकथा जैतून डांडा बेथफागे नु बेथानी जाकदीम्मा बाक्त।

2 मिनु येसुमी आ शेंसीब निक्शी आस कली “मेरे गाउं लसे। मिनु गाउं ओव्रसीनु, सुइ मडोइशशो गधा आ चाइक्ब पाइशशा, वोइशशो थित्नीसी।

3 मेको चाक्कीसे। मुरपुकीमी ‘मारदे लाइक्सी?’ देंतेक्म हना ‘प्रभु कली माल्ताक्व। नोले लेशशा सोइक्ब’ देंसीनु, लाइक्चा गेनीम” दे सोइक्तीम्सी बाक्त।

4 मिनु मेको निक्शी लशा, मेक जाकदीशशा, लांमी लाप्चो आ डोंइती पाइशशो गधा आ चाइक्ब थित्से बाक्त। मिनु प्रोन्से बाक्त।

5 मेकेर बाक्ब मुरपुकीमी “मारदे प्रोंइसी?” देंमा बाक्त।

6 मिनु येसुमी देंशो खोदेंशो पा, लोव्र लेत्से बाक्त। मिनु लाइक्चा गेमे बाक्त।

7 मिनु गधा आ चाइक्ब चाक्से बाक्त। मिनु आन वासी ब्रामे बाक्त। मिनु येसु डोंइसे बाक्त।

8 मिनु शुशेमी आन बरखी लांमी ब्रामे बाक्त। अरुमी एर ओंथ डा राशी जिकशा, लांमी ब्रामे बाक्त।

9 डोंइती नोले गाक्बपुकीमी “होसन्ना, प्रभु आ नेमी जाक्ब ठेयब दुम्ल। होसन्ना आ देंशो ‘परमप्रभु वारच पने’ बाक्ब। भजन संग्रह ११८:२५-२६

10 मुल जाक्चशो इं किकी पिपी दाऊद आ राज्य कली जाइ। परमप्रभु कली होसन्ना” दे रेयके पा ठेयब सेल्ना सेल्न गाक्मा बाक्त।

11 मिनु यरूसलेम जाकदीशा, परमप्रभु यावे आ खिं ओव्रमाक्त। मिनु एर ओंथ मारेइ मारेइ कोव्रशा, आ शेंसीब १२ जना नु बेथानी लेम्माक्त। मारदे हना नां रिक्चशो बाक्माक्त।

फल मसिश्शो फोव्रशी रवा

मत्ती २१:१२-२२; लूका १९:४५-४८; यूहन्ना २:१३-१६

12 आ दीसा बेथानी रे पिशा, लांमी गाकमानु, येसु शोव्रलु बेकमाक्त।

13 मिनु इच्छी आइक्था सफा पाइश्शो फोव्रशी रवा तशा, फोव्रशी सिश्शो बाकम कों दे कोव्रथ लमाक्त। मिनु जाकदीश्शा कोव्रडानु, सफा ला तवा बाक्त। मारदे हना सित्ची मजाकशो बाकमाक्त।

14 मिनु “मुल डा मेरे सुइमी इ फल जचा मतामेकल” दे मदा बाक्त। आ शेंसीबपुकीमी मो देंशो नेन्मे बाक्त।

ग्यापब लेयब आन कली खेरशो

15 मिनु यरूसलेम जाकदीम्मा बाक्त। जाकदीश्शा येसु परमप्रभु यावे आ खिं ओव्रशा, मेकेर ग्यापब लेयब आन कली खेरचा गोवा बाक्त। क्येट फाइकब आन क्येट वोइक्तीके नु हुकुर लेयब आन नित्तीके खोल्शा गेमी बाक्त।

16 मिनु सुइ कली मारेइ यो चाकशा लेयचा मगेथु,

17 “जात जात डा मुरपुकीमी एकेर प्रार्थना पामेकल दे आं खिं वोइश्शो बाक्त दे ब्रेकशो बाकबा, ममाइ डा? गेपुकीमी चहिं खुइपुकीमी खुइ पा चाकशा आन बाक्तीके पुक्खी सेल्लतीनी” दे हुइक्तीमी बाक्त। यसैया ५६:७; येरमीया ७:११

18 मिनु फरिसी नु सास्त्रीपुकीमी मेको नेंशा, दोपा साइक्चा दे लां कोव्रडमे बाक्त। तन्न येसु कली तशा, हिंमा बाक्त। मारदे हना मुर नेल्लेमी आ शेंशो नेंशा, छक लाकबाकमा बाक्त।

19 मिनु नां रिक्चावानु, येसु नु आ शेंसीबपुकी सहर रे लेम्मा बाक्त।

दल्गीर मपथु, प्रार्थना पचा

20 मिनु सुनी लां गाकमानु, फोव्रशी रवा आ डर रे पुं सम्म सोव्रशो तामे बाक्त।

21 मिनु पत्रुसमी ति फुक्शा, येसु कली “ए शेंब, कोव्रडीन, इन सराप पशो फोव्रशी रवा सोव्रमाक्त” देंमाक्त।

22 मिनु येसुमी मेको आन कली “परमप्रभु यावे कली थमा सुतीने।

23 नोफा दाइशशा नेनीने, सुमी आं देशो थमा दुम्ब, दे दल्लीर मपथु, मेको डांडा कली ‘एकेर रे समुन्द्रमी याक्सो’ दंत हना, मेको आ थमा सुइशशोमी डांडा याक्सीशा लाइब। मर्कूस ९:२३; मत्ती १७:२०

24 मोपतीके ‘आं पुंइशो ताइनुड’ दे थमा सुइशशा, प्रार्थना पा पुंइतीनी हना, इन पुंइशो ताइनीनी। मत्ती ७:७; यूहन्ना १४:१३; १५:१४-१५

25 प्रार्थना पा बाक्नीनु, सुइ नु चुरशो बाक्तीनी हना, मेको कली माफ गेने। मिनु स्वर्गम बाक्ब इन आफोमी यो इन मरिम्शो पशो क्याम्शा माफ गेब।

26 माफ मगेतीनी हना, स्वर्गम बाक्ब इन आफोमी यो इन कली माफ मगेब” दे शेंदीमी बाक्त।

अधिकार आ पर्बम हिल्लो पशो

मत्ती २१:२३-२७; लूका २०:१-८

27 मिनु यरूसलेममी जाक्दीम्मा बाक्त। मिनु येसु परमप्रभु यावे आ खिंमी हिरसेनु, ठेयब चढेब, सास्त्री नु जोक्ब तुइक्ब खाल्पापुकी जाक्शा

28 “तेको अधिकारमी मोदेशो पवी? मो पचा, दे सुमी अधिकार गेवे?” देंमा बाक्त।

29 मिनु येसुमी “गो इन कली लोत्र का हिल्लो पाइनुड, मेको लोत्र लेत्तीने। मिनु तेको अधिकारमी एको गेय पडा शेंनन्नी।

30 यूहन्नामी मुर आन कली ब्वाक्कुमी खुम्शा गुंइतीके अधिकार स्वर्ग रे तवा देय मुर रे तवा? लो देनीन” दे माइक्मीनु,

31 मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोत्र मारदे थमा मसुइक्नी देंब।

32 मुर रे तवा बाक्त देंचा यो दोपा देंय” दे लोत्रसी पमुमा बाक्त। मोदेशो देंचा हिंमा बाक्त। मारदे हना मुर नेल्लेमी यूहन्ना थमान

परमप्रभु यावे आ लोत्र पाइब बाकब, दे थमा सुइशो बाकमा बाक्त।
लूका ७:२९-३०

33 मोपतीके “मतुइक्नीकी” देंमानु, येसुमी “मो हना तेको
अधिकारमी एको गेय पडा दे गो यो मशेंनन्नी” दे माइक्मी बाक्त।

12

मरिम्शो बुम्था पाइब आन कथा

मत्ती २१:३३-४६; लूका २०:९-१९

1 मिनु येसुमी कथा सेल्शा, शेंचा गोवा बाक्त। मिनु “मुर कामी
अङ्गुर खुम्शा, थारपु हिरशा, अङ्गुर खाक्तीक खाल्टा दोशा,
धन्सार सेल्शा, बुम्था पाइब माल्शा, मेको आन कली गेशा
वोइशशा, अर्को रागी लमाक्त। यसैया ५:१-२

2 मिनु अङ्गुर मीशा, सेक्ची जाक्मेनु, आ गेय पाइब का कली
आ भाग पोक्थ सोइक्ता बाक्त।

3 मिनु मेको जाक्दीम्मेनु, बुम्था पाइबपुकीमी मेको कली तुप्शा,
श्येत्थ गुइ सोइक्तमे बाक्त।

4 मिनु लेंशा गेय पाइब का कली सोइक्ता बाक्त। मेको कली यो
जिचा तोशा, पिया प्रोल्शा, गार सेल्शा सोइक्तमे बाक्त। २इतिहास
३६:१६

5 मिनु लेंशा का कली सोइक्तानु, मेको कली सदमे बाक्त। मोदें
शुश खेयप गेय पाइब आन कली सोइक्तानु, का निक्शी आन कली
तुप्मे बाक्त। का निक्शी आन कली सदमे बाक्त।

6 मिनु सोइक्ने चाप्चा डा का ला लीमाक्त। मेको आ दाक्शो तौ
बाक्माक्त। मिनु ‘आं तौ आ देंशो टीनीम’ दे मिम्शा, आ तौ कली
सोइक्ता बाक्त।

7 मिनु बुम्था पाइबपुकीमी ‘एको दा अङ्गस ताइब बाक्त। लो
साइक्चा। मिनु आ अङ्गस नेल्ल इं केन दुम्ब’ देंमुशा गारमा बाक्त।

8 मिनु ग्याइशशा, साइशशा, रू रे लाइशशा ताइक्तमे बाक्त। हिब्रू
१३:१२

9 मोदेशो दुम्त हना, रू आ होवपम मार पाइबा? जाक्शा, मेको बुम्था पाइब आन कली साइक्ब। मिनु आ रू अरु आन कली गेब।

10 'खिं सेल्बपुकीमी गारो प्रोवडमेनु, एको फुल्लु मगार, दे ताइक्तमे बाक्त। मेको मगारथु ताइश्शो फुल्लु चहिं सुर डा सुरे फुल्लु दुम्माक्त' दे ब्रेक्शो लोव्र मपढेनी?

11 मेको नेल्ल प्रभुमी पशो बाक्त। मिनु 'ओहो, गिश रिम्शो दुम्मे। एको छक लाक्चा डा बाक्ब' दे ब्रेक्शो बाक्ब" दे माइक्मी बाक्त। भजन संग्रह ११८:२२-२३

12 मिनु "एको कथा इं कली कका देंमाक्त" दे रुष्शा, ग्याइक्पाइक्चा माल्मे बाक्त। तन्न शुश मुर देल्शो तशा हिंशा, ब्राशा लमा बाक्त।

तिरो थाप्चा देय मथाप्चा?

मत्ती २२:१५-२२; लूका २०:२०-२६

13 मिनु येसु कली लोव्र खाइक्पाइक्चा दे फरिसी नु हेरोदी का निक्शी येसु आ बाक्तीके सोइक्तमे बाक्त।

14 मिनु मेको सोइश्शोपुकी जाक्शा, येसु कली "शेंब, गे थमा पाइब ननी। मुर आन कुल मकोव्रथु सुइ तशा महिंथु, परमप्रभु यावे आ लोव्र थमा पा शेंनीनी, दे तुइक्नीकी। सिजर सरकार कली तिरो थाप्चान माल्ब देय मथाप्थु यो दुम्बा?

15 गोपुकीमी थाप्चा देय मथाप्चा? मार देंनीनी" दे हिल्लो पखु पा लोव्र खाइक्पाइक्चा माल्मे बाक्त। मिनु येसुमी मेको आन पचा माल्शो तुइश्शा, मेको आन कली "मारदे आं थुं थाम्नीनी? देनार का कोंइदीनी" देंमाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त।

16 मिनु देनार का कोंइदमे बाक्त। मिनु येसुमी "एको सु आ नेमी खोइश्शो बाक्मे?" देंमेनु "सिजर आ नेमी खोइश्शो बाक्त" देंमा बाक्त।

17 मिनु येसुमी "सिजर आ मार मार बाक्मा, मेको सिजर कली गेने। परमप्रभु यावे आ मार मार बाक्मा, मेको परमप्रभु यावे कली

गेने” दे माइक्मी बाक्त। मिनु नेल्ल छक लाक्मा बाक्त। रोमी १३:१७

बेक्शो रे सेंसीचा आ पर्बम शेंशो
मत्ती २२:२३-३३; लूका २०:२७-३८

18 मिनु सदुकीपुकी जाक्मा बाक्त। सदुकीपुकीमी बेक्शो रे मसेंसीब दे शेंनीम। मिनु येसु आ बाक्तीके जाक्शा

19 “ए शेंब, मोसामी ब्रेक्शो लोत्रमी ‘सुइ आ लोकब आल मथिथु बेक्त हना, मेकोमी आ भोग्यु वोंइसीशा, आ लोकब आ खिं डा मुर मजाम्मल, दे तमी तौ थिचल’ दे ब्रेक्शो बाक्त। ब्यवस्था २५:५-६

20 मिनु खिं कामी ७ जना लोकब बाक्मा बाक्त। डोंइती जेठामी मीश चाक्गा बाक्त। मिनु आल मथिथु बेक्माक्त।

21 मिनु माइलामी आ भोग्यु वोंइसे बाक्त। मिनु आ यो आल मथिथु बेक्माक्त। मिनु साइलामी वोंइसे बाक्त। मेको यो आल मथिथु बेक्माक्त।

22 मोदेशो पा ७ जनान आल मथिथु, बेक्मा बाक्त। मिनु नोले मेको मीश मुर यो बेक्माक्त।

23 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?” दे हिल्लो पामे बाक्त।

24 मिनु येसुमी “गे परमप्रभु यावे आ लोत्र मरुप्नीनी। परमप्रभु यावे आ सक्ति यो मतुइक्नीनी। मोपतीके दूली मिम्नीनी, ममाइ?

25 बेक्शो रे सेंसीशा ब्रोंइमानु, मुरपुकीमी ग्युंबे मपाइनीम, स्वर्गम बाक्ब परमप्रभु यावे आ गेय पाइबपुकी खोदेशो दुम्नीम।

26 बेक्शो रे सेंसीचा आ पर्बम परमप्रभु यावेमी मोसा कली मी ब्रशो रवा आ नेक्था ग्रुम्शा ‘अब्राहाम आ परमप्रभु यावे, इसहाक आ परमप्रभु यावे नु याकूब आ परमप्रभु यावे गो नड’ दे मदा बाक्त दे मोसामी ब्रेक्शो किताबमी ब्रेक्शो बाक्ब। मेको लोत्र मपढेनी? प्रस्थान ३:६

27 परमप्रभु यावे बेक्शो मुर आन परमप्रभु ममाइ, ब्रोंइशो आन परमप्रभु यावे बाक्ब। गे दूली मिम्बाक्नी बाक्त” दे माइक्मी बाक्त।

नेल्ल क्येडा तुइक्चा माल्लो लोत्र

मत्ती २२:३५-४०; लूका १०:२५-२८

28 मिनु सास्त्री कामी सदुकीपुकीमी येसु नु लोत्र पशो नेंशा, येसुमी मेको आन लोत्र लेन्ने चाप्बाक्त, दे रुप्शा डा मिन, येसु आ नेक्था जाक्शा “ए शेंब, परमप्रभु यावे आ अरेशो लोत्र तेको नेल्ल क्येडा डोंइती डा बाक्बा?” दे हिल्लो पवा बाक्त।

29 मिनु येसुमी “नेल्ल क्येडा डोंइती डा लोत्र एकोन बाक्ब ‘ए इस्राएल नेनो, इ परमप्रभु यावे का बाक्ब।

30 थुं का पा, सोक्त का पा, मिम्तीके नु सक्ति नेल्लेमी परमप्रभु यावे, इ परमप्रभु कली दाक्तो’ देशो एको लोत्र नेल्ल क्येडा डोंइती डा बाक्ब। ब्यवस्था ६:४-५

31 मिनु आ नोले डा ठेयब लोत्र ‘आंम इ कली दाक्शो खोदेशो पा इ नेक्था बाक्ब आन कली यो दाक्तो’ देशो बाक्ब। एको लोत्र निक्शी क्येडा ठेयब लोत्र मबाक्ब” देमाक्त। लेवी १९:१८

32 मिनु सास्त्रीमी “शेंब, गे थमान ठीक लोत्र पाइतीनी। परमप्रभु यावे कानाइ बाक्ब। आ डा लाक्शा सुइ मबाक्ब। लूका २०:३९-४०

33 मिनु थुं का पा, रुप्तीक नु सक्ति नेल्लेमी परमप्रभु यावे कली दाक्चा, आंम कली दाक्शो खोदेशो पा इ नेक्था बाक्ब आन कली दाक्चा, देशो लोत्र नेल्ल क्येडा ठेयब बाक्त। मारेइ मारेइ क्योरशा चदेशो क्येडा मेको लोत्र टिशा पचा रिम्शो बाक्ब” देमाक्त। १सामुएल १५:२२; होसे ६:६; मत्ती ९:१३

34 मिनु येसुमी “एकोमी निप्स खाप्शो लोत्र पाइबाक्त” दे रुप्शा “गे परमप्रभु यावे आ राज्य रे डोन मबाक्नी बाक्त” दे मदा बाक्त। में डा मेरे हिंशा, सुइमी लोत्र हिल्लो मपामे बाक्त। प्रेरित २६:२७-२९

ख्रीस्त सु का आ तौ बाक्बा?

मत्ती २२:४१-४६; लूका २०:४१-४४

35 मिनु येसुमी परमप्रभु यावे आ खिंमी शेंना शेंन बाक्मेनु “ख्रीस्त दाऊद आ तौ बाक्माक्त, दे सास्त्रीपुकीमी दोपा शेंने चाप्नीमी डा? यसैया ११:१; यूहन्ना ७:४२; रोमी १:३

36 दाऊदमी परमप्रभु यावे आ सोक्त रे पा ‘प्रभुमी आं प्रभु कली इ जोरी सत्रु आन कली इ खोइली आगाम मवोदुमी सम्म आं ग्युरा गे बाक्को’ देंत। भजन संग्रह ११०:१; २सामुएल २३:२

37 दाऊदमी मेको कली प्रभु देंब। मिनु दोपा आ तौ दुम्ने चाप्बा डा?” दे शेंदा बाक्त। शुश मुरुमी आ शेंशो लोत्र नेंचा दाक्तमे बाक्त।

सास्त्री आन कली हुइश्शो

मत्ती २५:५-१४; लूका २०:४५-४७

38 मिनु शेंना शेंन “सास्त्री आन लोत्र क्येडा होस पांइसीने। मेकोपुकीमी लाइश्शो कोट फेक्शा गाक्चा दाक्नीम। बजारमी हिरशा, मान पपांइसीचा दाक्नीम।

39 गुम्तीक खिंमी ठेयब नित्तीकेमी नित्चा दाक्नीम। भोजमी मान पपांइसीचा डा नित्तीकेमी नित्चा दाक्नीम।

40 वोंइश बेक्शो मीश मुर आन शोंप नेल्ल नेक्शा गेशा, दुइश्शो दुइश्शो प्रार्थना पा कोंइखु पाइनीम। मोदेंशो पाइबपुकीमी अरु आन क्येडा शुश सजाइ ताइनीम” देंमाक्त। याकूब १:२७

पुडग मीश मुरु आ चढेशो क्येट

लूका २१:१-४

41 मिनु येसुमी क्येट चढेतीक एरे निश्शा, शुश मुरुमी क्येट चढेशो कोत्रना कोत्रन बाक्माक्त। क्येट थीब शुशेमी शुश क्येट चढेमे बाक्त। २राजा १२:१०

42 मिनु आ वोंइश बेक्शो मारेइ मथीब पुडग मीश मुर का जाक्शा, लेप्तोन निक्शी चढ़ेवा बाक्त। लेप्तोन का नेल्ल क्येडा आइक्च तांबा के क्येट बाक्त।

43 मिनु येसुमी आ शेंसीब आन कली ब्रेशा “नोफा दाइशशा नेनीने, नेल्लेमी चढ़ेशो क्येडा मेको पुडग मीश मुरुमी शुश चढ़ेप्टु।

44 आ जशा ब्रोंइतीक क्येट नेल्ल गोप्टु। अरुमी चहिं आन गाप्शो रे गोम्तेक्म” देंमाक्त।

13

“परमप्रभु आ खिं मलीब” देंशो

मत्ती २४:-; लूका २१:५-३६; लूका १७:२३-३७

1 मिनु येसु परमप्रभु यावे आ खिं रे गूमेनु, आ शेंसीब कामी “ए शेंब, कोव्रडीन, एको खिं ठेयब फुल्लु के सेल्शा, दोमो कोल्शो गिश दारशो तांइसाक्व” देंमाक्त।

2 मिनु येसुमी “मुल ओमो ठेयब दारशो सेल्शो खिं ताप्तीवी। तन्न नोले ब्रेशा, फुल्लु का यो ख्रोप्शा मलीब” देंमाक्त।

श्येत दुम्चा गोइब

3 मिनु परमप्रभु यावे आ खिं तांइसीचा डा पा जैतून डांडामी निस्सेनु, पत्रुस, याकूब, यूहन्ना नु अन्द्रीयास जाक्शा, मत्ती १७:१

4 येसु कली “एको इन देंशो लोव्र गेना दुम्बा? एको नेल्ल दुम्चाप्टु, दे तुइक्पाइक्चा डा चिन्ड दोपा तांइसीनीमी? शेंदीकी” देंमा बाक्त।

5 मिनु येसुमी “सुइमी इं थुं मकयामेक्ल, दे होस पा बाक्कीन।

6 शुश मुरुमी आं नें ब्रशा ‘गो एको नड’ देंशा, मुर आन थुं कयाइक्नीम। यूहन्ना ८:४९

7 शुश लडाइ दुम्शो लोव्र नेनीनु, महिनीन। मोदेंशो दुम्चान माल्ब। रागी नुप्ची चहिं मजा।

8 रागी नुप्चा क्येडा डोंइती जात जात नु राज्य राज्यमी लडाइ पमुइनीम। रागी रागीमी खिनु कुइब। अन्काल दुम्ब। मो दुम्मेनु, श्येत दुम्चा गोवा बाक्त, दे तुंडसीब।

थमा सुइक्ब ग्याइक्चा पुंडसीनीम

9 आंम इन कली मिम्शा होस पा बाक्कीन। कछडी वोइक्चा पुंडसीनीनी। गुम्तीक खिंमी तुप्चा पुंडसीनीनी। आं नें आ पर्बम हुकुम पाइब नु पिप आन डोंइती राप्पाइक्चा पुंडसीशा, सांकछी दुम्चा माल्नीनी।

10 मोदेशो दुम्चा क्येडा डोंइती रागी नेल्ल डा मुर आन कली ग्येरपाइक्ब लोत्र नेंपाइक्ने थुम्शो दुम्चा माल्ब। मर्कूस १६:१५

11 मिनु इन कली ठेयब मुर आन डोंइती राप्पदमेनु, मार लोत्र पय, मार देंय? दे हिंशा, मिम्स डा मिम्स मबाक्कीन। इन कली दोदेशो लोत्र पचा गेशो बाक्मे, मोदेशो लोत्र पने। मारदे हना गे लोत्र मपाइनीनी, परमप्रभु यावे आ सोक्तीम इन कली लोत्र पपाइक्ब।

12 लोकबमी आ लोकब कली साइक्पाइक्चा गेब। आफोमी तौ कली साइक्पाइक्ब। मिनु तमी तौपुकीमी आम आफ आस कली ग्याइक्पाइक्शा साइक्पाइक्नीम।

13 आं नें आ पर्बम सुइम इन कली मदाक्नीम। सु सु चहिं नेल्ल क्येडा नोले सम्म थमा सुइक्चा मप्रोंइथु बाक्नीमी, मेकोपुकी श्येत जचा रे ब्रोंइशा, गेना हना यो परमप्रभु यावे नु बाक्चा ताइनीम। यूहन्ना १५:१८,२१

मुल सम्म मदुम्शो श्येत दुम्ब

14 परमप्रभु यावे आ खिं गेनायो मदुम्चा डा पा बिथोलो दुम्मेनु, मेको मुल पढेबपुकीमी रुप्मेक्ल, यहूदीया रागीम बाक्बपुकी डांडा ग्येत्थ प्रोक्मल। दानीएल ९:२७; दानीएल ११:३१; दानीएल ११:३१

15 बारदालीम बाक्बपुकीमी 'तोइक्शा, खिं ओव्रशा मारेइ लाइक्चा ताइनुड' दे ममिम्तमेक्ल, दिव दाव प्रेक्शा प्रोक्मल।

१६ रूमी गेय पाइबपुकीमी 'फेक्तीक का लाइक्नुड' दंशा, खिं मलेम्मल। तन्न आन गेय थु था प्रोंइशा प्रोक्मल।

१७ कोव्रज कुरशो नु दूध तूब आल पाइशशो मीश मुर अरु क्येडा शुश श्येत जाइनीम।

१८ हिउंदमी मोदेंशो श्येत मदुम्ल, दे परमप्रभु यावे कली पुनीने।

१९ परमप्रभु यावेमी रागी सेला रे मुल सम्म सुइमी मतुइशशो श्येत दुम्ब। मोदेंशो श्येत लेंशा गेनायो मपीब। दानीएल १२:१

२० प्रभुमी मोदेंशो श्येत जतीक नाक्त शुश वोइशशो हना, सुइ ब्रोंइने मचाप्नीम। तन्न आ योव्रशो आन पर्बम प्रभुमी मेको श्येत शुश नाक्ती लीचा मगेब।

२१ मिनु मुरपुकीमी 'ख्रीस्त एकेर जाक्त, मेरेक बाक्ब, लो कोव्रडीन' दंतैक्म हना, थमा मसुतीन।

२२ शुशेमी 'गो ख्रीस्त नड' दे जोल पा गाक्नीम। 'परमप्रभु यावे आ लोव्र पाइब नकी' दे जोल पाइबपुकीमी चिन्ड नु छक लाक्चा डा गेय पा कोइनीम। मेकोपुकीमी परमप्रभु यावे आ योव्रशो आन कली यो लां प्रोंइपाइक्चा माल्नीम।

२३ मेको दुम्चा डोंइतीन नेल्ल शेंशा तुइक्पाइक्तन्नी। एको लोव्र मिम्शा मप्रेंथु बाक्कीन।

रागीम जरमेशो जाक्ब

२४ रागीमी मोदेंशो ठेयब श्येत नुम्मेनु, सरीडमी चिन्ड तांइसीनीम। नां आ छेडछेड जाम्शा, जिक रिक्शो दुम्ब। तास्ला आ हाम्सो यो जाम्ब।

२५ सोरुल खपीम दोक्नीम। सरीडमी बाक्शो सक्तिपुकी हिम्सीनीम। हिबू १२:२६

२६ मिनु मुरपुकीमी रागीम जरमेशो कली गोस्सुमी गिल्सीशा, शुश सक्ति पाइशशा, यिना यिन पशो ताइनीम। दानीएल ७:१३

27 मिनु रागीम जरमेशोमी परमप्रभु यावे आ गेय पाइब आन कली रागी तेइ तेइ रे परमप्रभु यावे आ योत्रशो नेल्ल आन कली खुप्शा चाक्थ सोइक्ब। मत्ती १३:४१

28 फोत्रशी रवा कोच्वा दाप्शा कुशो तनीनु, बर्खा जाक्माक्त दे तुइक्नीनी।

29 आं देशो लोत्र थमा दुम्शो तनीनु, आं जाक्ची जाक्माक्त दे तुइक्नीनी।

30 नोफा दाइशशा नेनीने, एको जात डा मुर मनुप्थु, आं देशो थमा दुम्ब।

31 सरीड नु रागी नेल्ल जाम्शा लाइनीम, आं लोत्र चहिं गेना हना यो मजाम्थु लीब।

32 मोदेशो गेना दुम्ब, दे सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी लायो मतुइक्ब। आं आफोमी ला तुइक्ब।

सासीशा बाक्चा माल्ब

33 मोदेशो गेना दुम्बा मतुइक्नीनी। मोपतीके सासीशा बाक्कीन। लूका १२:३५-४०; लूका २१:३६

34 दोदेशो दुम्ब देशा हना, मुर का तेइ तेइ हिरथ लमेनु, लचा डोंइती आ गेय पाइब आन कली का का पा आन गेय योक्शा, लाप्चो खाल पाइब कली 'गेना हना यो लां कोत्रशा बाक्को' दे माइशशा लाइब।

35 आं खिं डा प्रभु गेना लेशशा जाक्बा, दे मतुइक्नीनी। नां रिक्शा जाक्बा कों? नाक्दो जाक्बा कों? भाले ग्रीची ना जाक्बा कों? सुनी जाक्बा कों दे मारेइ मतुइक्नीनी। मेको इन मतुइक्थु जाक्ब। लूका १२:३८

36 इन मतुइक्थु जाक्मेनु, इन कली इप्शो मथिदल।

37 मोपतीके लां कोत्रशा सासीशा बाक्कीन दे माइक्तन्नी। मोदेशो नेल्ल आन कली माइक्नुडमी” दे शेंदीमी बाक्त।

14

येसु कली साइक्चा माल्शो

मत्ती २६: - २८:-; लूका २२: - २४:-; यूहन्ना १८: - २१:-

- 1 मिनु बोरब ओख्ती मसुप्शो शोब्ले जतीक पास्सा चाड आ निक्शी नाक्ती डोंइती ठेयब चढेब नु सास्त्रीपुकीमी “येसु कली दोपा मुर आन मतुइक्थु ग्याइश्शा, साइक्पाइक्चा” दे लोव्सी पमुमानु
- 2 “चाड नाक्ती मदुम्ब, मुरपुकीमी मरिम्शो पाइनीम” देमुमा बाक्त।

येसु तेल खेक्चा पुंइसीशो

- 3 येसु बेथानीमी कोर पाइब सिमोन आ खिंमी खमे जना जन बाक्मेनु, मीश मुर कामी शुश क्येट लाइब ब्रोव्शो रिना पाइश्शो तेल कुरशा जाक्शा, मेको तेल येसु आ पियामी लुक्ता बाक्त।
- 4 मिनु मेकेर बाक्ब का निक्शीमी “ओदेशो तेल मारदे एकोमी ओपा ताइक्ता?
- 5 लेयड हना, सहे सां देनार क्येडा शुश ताक्शा, श्येत जाइब आन कली योक्शा, वारच पने चाम्स वा” दे आन थुं मनुथु, मीश मुर कली हुइक्तमे बाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त।
- 6 मिनु येसुमी “महुइक्तीने, मारदे आ थुं खाइक्पाइक्नी? आं कली रिम्शो पाइक्ती।
- 7 श्येत जशो मुर गेना हना यो थित्नीनी, मिनु शिशी पाइक्चा दाक्ताक्नी हना, गेना हना यो पाइक्ने चाप्नीनी। आं कली चहिं नोले मथित्नीनी। ब्यवस्था १५:११
- 8 आ चाप्शो पाप्तु। बेक्चा क्येडा डोंइती आं रां थिम्चा कली तेल खेक्ताक्व।
- 9 नोफा दाइश्शा नेनीने, रागीम ते ते आं लोव् नेंपाइक्नीमी, मेक मेक एको आ पशो आ पर्बम यो लोव् पाइनीम” देंमाक्त।

इस्कारीयोत डा यहूदा आ पशो

10 इस्कारीयोत डा यहूदा येसु आ शेंसीब कामी ठेयब चढेब आन कली “येसु कली ग्याइक्चा वारच पाइनन्नी” दे लोत्र पथ लमाक्त। मिनु मेकोपुकीमी आ देंशो नेंशा, ग्येरशा “लो, रिम्शोन दुम्त। क्येट गेनीकी” देंमा बाक्त।

11 में डा मेरे “गेना नु दोपा ग्याइक्चा वारच पदुमी” दे योत्रकी पना पन गाक्माक्त।

पास्सा चाड डा भोज

12 बोरब ओख्ती मसुप्शो शोब्ले जतीक चाड आ डोंइती डा नाक्ती पास्सा डा पाठा क्योरशा ब्वाइनीम। मिनु येसु आ शेंसीबपुकीमी “पास्सा मानेचा कली ते लशा साचा? मार देंनीनी?” दे हिल्लो पामे बाक्त।

13 मिनु येसुमी शेंसीब निक्शी आस कली “सहर लसे। मिनु गाग्री कुरशो मुर का कली गुम्नीसी। मेको आ नोले खोतीसे।

14 मिनु मेको तेको खिं ओत्रबा, गे यो ओवडीसे। मिनु खिं डा मुर कली “शेंबमी सोइश्शो नस्कु। शेंबमी आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्सकी” दे मतीसे। मर्कूस ११:३

15 मो माइक्सीनु, मेकोमी इस कली तला तारी ठेयब कोठा का कोइब। मेको कोठामी गुन्द्री पीरा ब्रशा वोइश्शो थित्नीसी। मिनु मेकेरन साचा” दे सोइक्तीम्सी बाक्त।

16 मिनु मेको निक्शी लशा, सहर जाक्दीश्शा, येसुमी दोदेशो देंमे, मोदेशो थित्से बाक्त। मिनु पास्सा चाड डा भोज सादसे बाक्त।

17 मिनु नां रिक्मेनु, येसु नु आ १२ जना शेंसीब खुम्समा बाक्त।

18 मिनु जना जन बाक्मानु, येसुमी “नोफा दाइश्शा नेनीन। मुल एक बाक्ब काम आं कली ग्याइक्ब आन कली वारच पाइब। मुल गो नु काथा जना जन बाक्ब” देंमाक्त। यूहन्ना १३:२१-२६

19 मिनु नेल्लेमी शुश मरिम्शो लाक्शा “ए प्रभु, मेको वारच पाइब गो दुम्नुडा को?” दे का का पा हिल्लो पामे बाक्त।

20 मिनु येसुमी “१२ जना शेंसीब इन दाते डा का बाक्ब। गो नु काथा शोब्ले शेक्कुम तेप्बमी आं कली ग्याइक्पाइक्चा वारच पाइब।

21 मारदे हना रागीम जरमेशो आ पबर्म ब्रेक्शो लोव्र नेल्ल थमा दुम्बा माल्ब। मेको बेक्चा माल्ब। मो हना यो रागीम जरमेशो कली ग्याइक्पाइक्चा वारच पाइब कली शुश मरिम्शो दुम्ब। मो देंशो पाइब मुर मजरमेस हना, मेको कली रिम्शो दुम्ब वा” दे माइक्मी बाक्त।

22 मिनु जना जन बाक्मानु, शोब्ले शेशा “गे रिम्शो पाइब बाक्नीनी” दे प्रार्थना पशा जिक्शा, आ शेंसीब आन कली योक्शा “दांडसीने, एको आं रां बाक्ब” देंमाक्त। १कोरिन्थी ११:२३-२५

23 मिनु कचौरा शेशा “गे रिम्शो पाइब बाक्नीनी” दे प्रार्थना पा, मेको आन कली तूचा गेमी बाक्त। मिनु नेल्लेमी तूडमे बाक्त।

24 मिनु “एको आं हुश बाक्ब। आं हुशेमी परमप्रभु यावे आ गेशो नक लोव्र खाप्ता। आं हुश जारशोमी शुश मुर आन पाप क्याम्सीब। प्रस्थान २४:८; हिब्रू ९:१५-१६

25 नोफा दाइश्शा नेनीन, मुल डा मेरे एको अडगुर रे सेल्शो तूतीके मतनुड। नोले नेल्ल नक दुम्शा, परमप्रभु यावे आ राज्यमी बाक्शा तूनुड” दे माइक्मी बाक्त।

26 मिनु कुम्सो पा बोक्शा, जैतून डांडा ग्येत्थ लमा बाक्त। भजन संग्रह ११३:- ११८:-

पत्रुसमी “गेनायो मप्रोंइनन्नी” देंशो

27 मिनु लना लन बाक्मानु, येसुमी “गे नेल्लेमी इन थुं ग्यशा, आं कली प्रोंइनीनी। मारदे हना ओदें ब्रेक्शो लोव्र थमा दुम्ब ‘गो गोठला कली तुप्शा खेरनुड। मिनु भेडापुकी प्रोक्शा, साव सुव ब्राइनीम’ देंशो बाक्ब। जकरिया १३:७; यूहन्ना १६:३२

28 नोले गो बेक्शो रे सेंचा पुंडसीशा, इन डांडेती गालील रागी जाक्दीत्नुड” देंमाक्त। मर्कूस १६:७

29 मिनु पत्रुसमी “मेको नेल्लेमी इन कली प्रोंइशा प्रोक्तेक्म हना यो, गो मप्रोंइनन्नी” देंमेनु, यूहन्ना १३:३८

30 येसुमी “नोफा दाइश्शा नेनो, में नाक्दोन भाले खेयप निक्शी मग्रीथु, खेयप सां सम्म ‘मेको कली मतुइक्नुड, सु बाक्म’ दे आं पर्बम देंनेवे” दे मदा बाक्त।

31 मिनु पत्रुसमी “मदेनुड, गे नु काथा बाक्शा, साइक्चा पुंडसाकयी हना यो, मोदेशो गेनायो मदेनुड” दे लोत्र थोक्शा देंमाक्त। आ शेंसीब नेल्लेमी यो मो देंमा बाक्त।

गेथ्सेमनेमी प्रार्थना पशो

32 मिनु गेथ्सेमने जाक्दीम्मा बाक्त। मिनु येसुमी “लो, एक बाक्कीन। गो इच्ची आइक्था लशा, प्रार्थना पाइनुड” देंशा,

33 पत्रुस, याकूब नु यूहन्ना सां आन कली आइक्था लाइश्शा लमाक्त। येसु आ थुं शुश खाइक्माक्त। मत्ती १७:१

34 मिनु सां आन कली “आं थुं शुश खाइश्शा, बेक्चा डा दुम्ती। मइप्थु गो नु काथा बाक्कीन” दे माइक्मी बाक्त। यूहन्ना १२:२७

35 मिनु इच्का डोंइती लशा, खपीम बाप्शा “दुम्त हना, मुल दुम्चशो श्येत मदुम्ल” दे प्रार्थना पवा बाक्त।

36 मिनु “आब्बा, आं आफ, गे मारेइ मारेइ पने चाप्नीनी। एको कचौरा आं कली मत्पाइक्थु लतीने। तन्न आं दाक्शो मदुम्ल। इन दाक्शोन दुम्ल” दे प्रार्थना पशा, लेशशा जाक्माक्त। येसुमी आइक्च आल खोदेशो पा आ आफ कली आब्बा देंत।

37 लेशशा जाक्मेनु, सांफा आन कली इप्शो तामी बाक्त। मिनु पत्रुस कली “ए सिमोन, इमे? छिन का यो मइप्थु बाक्ने मचबी? मर्कुस १०:३८

38 थुं थाम्चा पुंडसेनु, पाप मपड, दे मइप्थु बाक्शा प्रार्थना पावो। थुंमी पाइनुड, चाप्नुड देंब, तन्न रांमी फाल्ने मचाप्ब” दे मदा बाक्त।

39 मिनु लेशा इच्का आइक्था लशा, डोंइती प्रार्थना पशो खोदेशो पा, प्रार्थना पवा बाक्त।

40 मिनु लेंशा लेशशा जाक्शा, निन्द्रामी दुक्शा बाक्शो तामी बाक्त। मेकोपुकीमी मार देंचा, दे मारेइ मतुइक्तमे बाक्त।

41 मिनु लेंशा प्रार्थना पथ लशा, लेशशा जाक्शा, मेको आन कली “गे मुल सम्म इप्शा बाक्नीनी? मुल गाप्त। रागीम जरमेशो पापी आन गुइमी गेचा पुंइसीचा चिक्ताक्व।

42 लो बोक्कीन, लय। आं कली ग्याइक्चा वारच पाइब जाक्चाप्तु” दे माइक्मी बाक्त।

येसु ग्याइक्चा पुंइसीशो

43 मो माइक्मीनु, आ शेंसीब यहूदामी ठेयब चढेब, सास्त्री नु जोक्ब तुइक्ब खालपापुकीमी सोइश्शो तरवार कोक्के कुरब हुल, येसु कली ग्याइक्थ चाक्गा बाक्त।

44 यहूदामी “सु कली पुक्पु पदु, मेको कली ग्याइश्शा लतीने” दे ग्याइक्थ जाक्ब आन कली तुइक्पाइश्शो बाक्माक्त।

45 मिनु जाक्मानु, यहूदा येसु आ नेक्था लशा “रब्बी” दे बे मुप्शा, पुक्पु पवा बाक्त। हिब्रू लोत्रमी ठेयब शेंब कली रब्बी देंनीम।

46 मिनु ग्याइक्थ जाक्बपुकीमी येसु कली ग्याइक्तमे बाक्त।

47 मिनु येसु नु काथा बाक्ब कामी तरवार ग्रि शोइश्शा, ठेयब चढेब आ वाइल का आ नोफा दि खोदा बाक्त।

48 मिनु येसुमी आ कली ग्याइक्ब हुल आन कली “तरवार कोक्के कुरशा, खुइ पाइब कली ग्याइक्थ जाक्शो खोदेशो पा आं कली ग्याइक्थ जाक्नी?

49 नाक्त किंत किंत परमप्रभु यावे आ खिंमी गेपुकी नु काथा बाक्शा, शेंना शेंन बाक्डानु, मग्याइक्तीनी। तन्न परमप्रभु यावेमी ब्रेक्पाइश्शो लोत्र थमा दुम्या कली ओदेशो दुम्त” दे माइक्मी बाक्त।

50 मिनु आ शेंसीबपुकी येसु कली थु था प्रोइशा, साव सुव ब्रशा प्रोक्मा बाक्त।

51 मिनु येसु कली ग्याइश्शा फ्रेंशा लदमेनु, ठिटा का आन नोले खोदा बाक्त। मेको ठिटाम वा का ला गिल्सीशो बाक्माक्त।

52 मारदे हना मेको कली गयाइक्तमेनु, आ फेक्शो वा प्रोंइशा, शिश्रा प्रोक्शो बाक्माक्त। आमोस २:१६

येसु कली चढ़ेब आ डोंइती चाक्शो

53 मिनु येसु कली नेल्ल क्येडा ठेयब चढ़ेब आ डोंइती चाक्दीत्मे बाक्त। मेकेर ठेयब चढ़ेब, जोक्ब तुइक्ब खाल्पा नु सास्त्रीपुकी खुम्सीशा बाक्शो बाक्मा बाक्त।

54 पत्रुस मेको आन नोनोले खोइश्शा लशा, नेल्ल क्येडा ठेयब चढ़ेब आ लाडगा जाक्दीम्माक्त। मेकेर सिपाइपुकी नु काथा मी थेरशा बाक्माक्त।

55 ठेयब चढ़ेब नु मेकेर बाक्ब नेल्लेमी मार पामे बाक्त देंशा हना, जोल पा दोस गेशा, येसु कली साइक्पाइक्चा माल्मे बाक्त। तन्न दोस गेने मचाप्मे बाक्त।

56 शुश मुरुमी जोल पा सांकछी गेमे बाक्त, तन्न आन लोव्र मगारमाक्त।

57 सांकछी का निक्शी बोक्शा “एको गयाइश्शो मुरुमी साबेर मार देंशो नैतक देंशा हना

58 ‘एको गुइमी सेल्शो परमप्रभु यावे आ खिं प्रेशा, नाक्त सांमी अर्को सेल्नुड। मेको चहिं गुइमी सेल्शो ममाइ’ देंशो नैतक” देंमा बाक्त। यूहन्ना २:१९-२१

59 मो देंमा बाक्त हना यो, आन लोव्र मगारमाक्त।

60 मिनु नेल्ल क्येडा ठेयब चढ़ेब बोक्शा, आन दातेमी राप्शा, येसु कली “एकोपुकीमी देंशो लोव्र नेशा, मार देंनेवे?” दे हिल्लो पवा बाक्त। मर्कूस १५:५; यसैया ५३:७

61 मिनु येसु सिक्सी पा बाक्शा, लोव्र का यो मलेत्ता बाक्त। मिनु नेल्ल क्येडा ठेयब चढ़ेबमी “गे नेल्ल क्येडा मान ताइब परमप्रभु यावे आ तौ ख्रीस्त नवे?” दे हिल्लो पवानु,

62 येसुमी “गो नड। गे रागीम जरमेशो कली नेल्ल सक्ति पाइश्शो आ ग्युरा गे बाक्शो ताइनीनी। गोस्सुमी गिल्सीशा जाक्ना जाक्न पशो ताइनीनी” दे मदा बाक्त। भजन संग्रह ११०:१; दानीएल ७:१३-१४

63 मिनु नेल्ल क्येडा ठेयब चढेबमी आंम आ फेक्शो वा खाक्शा “परमप्रभु यावे कली शुक्शी लोत्र पाइबाक्त।

64 मार सांकछी माल्दा डा? आ शुक्शी पशो लोत्र गे नेल्लेमी नेंशा, सांकछी दुम्तीनी। एको कली मार पाइक्चा? मार देंनीनी?” दे माइक्मीनु, नेल्लेमी “साइक्चा माल्ब” देंमा बाक्त। यूहन्ना १९:७

65 मिनु साइक्चा माल्ब देंशा डा मिन, का निक्शीमी आ कुलम तोक्तमे बाक्त। का निक्शीमी आ मिक्च सुम्शा, तुप्शा “सुमी तुमे? लो देन” दे शुक्शी पामे बाक्त। मिनु सिपाइ आन गुडमी गेमे बाक्त। मेकोपुकीमी तुप्ना तुप्न लदमे बाक्त।

पत्रुसम “मेको कली मतुइक्नुड” देशो

66 आगाम मोदेशो दुम्मेनु, पत्रुस लाङगामी बाक्माक्त। मिनु गेय पाइब मीश मुर कामी जाक्शा,

67 पत्रुस कली मी थेरशो तशा, शिरशा कोत्रशा “गे यो मेको नासरथ डा येसु नु काथा गाक्ब का बाक्डे बाक्त” देंमाक्त।

68 मिनु पत्रुसमी “इ देशो मरुबु। मारेइ मतुइक्नु” देंमाक्त। मिनु ग्रूशा, ठेयब लाप्चो डा लां जाक्दीम्माक्त।

69 मिनु मेको गेय पाइब मीश मुरुमी पत्रुस कली लेंशा तशा, मेकेर बाक्ब आन कली “मेरे यो मेको नु गाक्ब का बाक्त” देंमेनु,

70 पत्रुसमी “गो मनड, मेको कली मतुइक्नुड” देंमाक्त। मिनु छिन का नोले मेकेर बाक्बपुकीमी यो “गे मेको नु काथा गाक्ब का बाक्डे बाक्त, मारदे हना गालील डा बाक्डे बाक्त, दे तुंडसीब” देंमानु,

71 पत्रुसमी “जोल पाता हना, यावेमी सजाइ गेयील, इन देशो मुर कली तुंडसीन मतुइक्नुड” दे कसम जशा, आ लोत्र थोक्शा देंमाक्त।

72 मो देंम चोटी भाले खेयप निक्शी ग्रीमाक्त। मिनु पत्रुसमी “भाले खेयप निक्शी मग्रीथु, खेयप सां सम्म मेको कली मतुइक्नुड, सु

बाक्म? देंनेवे” दे येसुमी देशो लोव्र ति फ्रुकगा बाक्त। मिनु आ पशो मिम्शा डाक्माक्त।

15

पिलातस आ डोंइती राप्पाइश्शो

1 मिनु नां सोव्रमेनु, ठेयब चढेब, जोक्ब तुइक्बखाल्पा नु सास्त्रीपुकी, सभाम बाक्ब नेल्ल खुम्सीशा, सल्ला पामे बाक्त। मिनु येसु कली फ्रेंशा लाइश्शा, पिलातस आ गुइमी गेमे बाक्त।

2 मिनु पिलातसमी येसु कली “गे यहूदी आन पिप नवे?” दे हिल्लो पवानु “गे आंमा देंतीनी” दे लोव्र लेत्ता बाक्त।

3 ठेयब चढेबपुकीमी शुश दोस गेमे बाक्त।

4 मिनु पिलातसमी येसु कली “इ कली शुश दोस गेम्तेक्मे। गे मेको आन कली मारेइ लोव्र मलेत्नेवे?” दे हिल्लो पवा बाक्त।

5 मिनु येसुमी लोव्र का यो मलेत्ता बाक्त। मिनु पिलातस छक लाक्माक्त। मर्कूस १४:६१; यसैया ५३:७

6 पास्सा नाक्ती पिलातसमी मुरपुकीमी प्रोंइचा, दे पुंइशो जेल्खानमी चोक्सीशो मुर का कली प्रोंइबाक्माक्त।

7 सरकार कली मरिम्शो पा जेल्खानमी चोक्चा पुंइसीशो मुर आन दाते डा बारब्बा माइश्शो का बाक्माक्त। मेकोमी मुर साइश्शो बाक्माक्त।

8 मिनु मुरपुकीमी पिलातस कली “साइ रे डा पशो खोदेशो पा मुर का कली प्रोनीन” दे पुन्मे बाक्त।

9 मिनु पिलातसमी “यहूदी, इन पिप प्रोंइचा दे पुंइनी?” दे हिल्लो पवा बाक्त।

10 मारदे हना ठेयब चढेबपुकीमी थुं चोशा, येसु कली ग्याइक्पदमे बाक्त दे रुप्शा, प्रोंइचा माल्शो बाक्माक्त। यूहन्ना ११:४८

11 तन्न ठेयब चढेबपुकीमी मुर आन कली हुल पोक्शा “मेको कली मप्रोंइचा, बारब्बा कली प्रोंइचा, सरकार” दे पुंइपदमे बाक्त।

12 मिनु पिलातसमी “गेपुकीमी यहूदी आन पिप देशो मुर कली मार पदु मिनु?” दे हिल्लो पवानु

13 “मेको कली शीमी क्येप्शा कांटी थोकशा क्याइक्चा माल्ब” दे रेयके पचा गोव्रमे बाक्त।

14 मिनु पिलातसमी “मार मरिम्शो पवा, मार दोस गेचा” देमेनु “शीमी क्येप्शा कांटी थोकशा क्याइक्चा माल्ब” दे शुश रेयके पामे बाक्त।

15 मिनु पिलातसमी “हुल आन दाक्शो पचा” दे मिम्शा, बारब्बा कली प्रोंइपदा बाक्त। येसु कली चहिं युक्पाइश्शा, शीमी क्येप्शा कांटी थोकशा क्याइक्चा कली सिपाइ आन गुइमी गेवा बाक्त।

येसु कली शीमी क्येप्शा क्याइश्शो

16 मिनु सिपाइपुकीमी येसु कली दरवार डा सिपाइ आन बाक्तीके चाक्दीश्शा, आन पल्टन नेल्ल खुप्शा डा मिन,

17 आ फेक्शो वा पुइश्शा, पिप आन फेक्तीक रड पाइश्शो वा फेक्पाइश्शा, चू के सिरपेच सेल्शा, आ पियाम गुप्तमे बाक्त।

18 मिनु “यहूदी आन पिप, सेउ ताक्कीन” दे सेउ पखु पामे बाक्त।

19 मिनु रेक्के के कोक्केमी आ पिया तेत्मे बाक्त। आ कुल तोक्तमे बाक्त। मिनु आ डोंइती पोक्च थेक्शा बाप्शा, ठेयब सेल्खु पामे बाक्त।

20 मिनु शुक्शी पचा रूशा, वा पुइश्शा, आंम आ वा फेक्पाइश्शा, गुंइशा, शीमी क्येप्शा कांटी थोकशा क्याइक्चा कली लदमे बाक्त।

21 मिनु लना लन बाक्मानु, आ गाउं रे पिशो साइरेनी डा सिमोन गुम्मे बाक्त। मेको सिमोन अलेकजन्डर नु रुफुस आस आफ बाक्माक्त। मेको कली ग्रुम्शा, येसु कली क्येप्तीक शी “लो, कुर कि कुर” दे कुरपदमे बाक्त। रोमी १६:१३

22 मिनु येसु कली गोलगथामी चाक्दीत्मे बाक्त। गोलगथा कली खप्परे यो देंसीब।

23 मिनु अडगुर शांबुमी मूरे माइशो तेल कुर पशो तूतीके गेमेनु, येसुमी तूने मबिस्से बाक्त।

24 मिनु शीमी क्येप्शा कांटी थोकशा क्यदमे बाक्त। क्याइशशा डा मिन, सुमी ताइबा, दे तुइक्चा कली वा वोइशशा फेन्टे आप्मे बाक्त। भजन संग्रह २२:१८

25 शीमी क्यदमेनु, सुनी डा ९ बजेशो बाक्माक्त।

26 “यहूदी आन पिप” दे दोस गेशा, ब्रेकशो ब्रेक्स यो क्येप्शो बाक्माक्त।

27 खुइ निकशी आस कली यो का आ ग्युरा गे, का आ पेरा गे क्याइशशा वोदमे बाक्त।

28 मो पशोमी “मरिम्शो पाइब सुइशशा, मरिम्शो पाइब नु काथा वोइक्चा पुंइसीब” दे परमप्रभु यावेमी ब्रेकपाइशशो लोत्र थमा दुम्माक्त। यसैया ५३:१२

29 मेकेर कोत्रब शुश मुर बाक्मा बाक्त। मेकोपुकीम आन पिया हिम्शा “परमप्रभु यावे आ खिं प्रेशशा, नाक्त सांमी नक सेल्लुड, देंते। खोइ मिनु, सेल्ले चबी? मर्कूस १४:५८

30 शीमी क्येप्शो रे प्रोंइसीशा तोंइसो” दे शुक्शी पामे बाक्त।

31 ठेयब चढेब नु सास्त्रीपुकीमी यो शुक्शी पा “शुश मुर आन कली श्येत रे प्रोंइना प्रोंइन गाक्बाक्त, आंम कली चहिं प्रोंइसीने मचाप्बाक्त।

32 इस्राएल डा पिप, ख्रीस्तमी शीमी क्येप्शो रे प्रोंइसेक्ल। प्रोंइसीशो ताइतय हना, थमा सुइक्नय” देंमुमा बाक्त। आ ग्युरा नु पेरा गे वोइशशो निकशीमी यो शुक्शी पदसे बाक्त। मत्ती १६:१४

33 मिनु नाक्त १२ बजे नां जिक रिक्शा, ३ बजे सम्म रागी नेल्ल छिडछिड दुम्माक्त।

34 मिनु ३ बजे गे येसुमी “एली, एली, लामा असाब्थानी” दे वाइ ब्रेम्माक्त। आ देशो मार रुम्सीब देशा हना “आं परमप्रभु, आं परमप्रभु, मारदे प्रोंइयीनी?” देशो रुम्सीब। भजन संग्रह २२:२

35 एर ओंथ बाक्बपुकीमी मो देंशा वाइ ब्रेशो नेंशा “नेनीने, एलीया कली ब्रेत्ताक्व” देंमुमा बाक्त।

36 मिनु का दोरशा लशा, रुवामी ग्युरशो तूचा थोव्रक नुष्शा, कोक्केमी लिक्शा युप्चा गेशा “एलीया जाक्शा, प्रोंइबा को? लो, कोव्रय” देंमाक्त।

37 मिनु येसु लेंशा काले वाइ ब्रेशा, नोले सोक्त कीशा बेक्माक्त।
प्रस्थान २६:३१-३३; २इतिहास ३:१४

38 मिनु बेक्म नोले मार दुम्माक्त देंशा हना, परमप्रभु यावे आ खिं आगा डा कोठामी बारेशो वा इर रे उइ सम्म उइक्थ पा जेर गाक्माक्त।

39 मिनु येसु आ डोंइती राप्शा बाक्शो कप्तानमी येसु वाइ ब्रेशा, नोले सोक्त कीशा बेक्शो तशा “थमा पा, एको मुर परमप्रभु यावे आ तौ बाक्माक्त” देंमाक्त।

40 येसु बेक्मेनु, शुश मीश मुरपुकीमी डोन रे कोव्रशो बाक्मा बाक्त। मोदेंशो कोव्रब का माग्दाला डा मरीयम बाक्माक्त। का याकूब नु योसेस आस ममा मरीयम बाक्माक्त। का सालोमे बाक्माक्त।

41 मेकोपुकी गालील रे यरूसलेम सम्म काथा गाक्शा, येसु कली वारच पना पन बाक्शो बाक्मा बाक्त। अरु यो काथा गाक्शा, यरूसलेम जाक्दीशो बाक्मा बाक्त। लूका ८:२-३

येसु आ रां पुक्खीमी वोइशो

42 येसु बेक्ची नाक्त चहिं नाइक्तीक नाक्त आ डोंइती नाक्त बाक्माक्त। मिनु नां रिक्मेनु, मार दुम्माक्त देंशा हना,

43 अरीमाथीया डा योसेफ माइशो, सभामी बाक्ब आन दाते डा हिक्सीशो मुर का बाक्माक्त। मेको परमप्रभु यावे आ राज्य तांइसेक्ल, दे आस पा बाक्शो बाक्माक्त। मेको मुरुमी महिंथु, पिलातस कली गुमथ लशा “येसु आ बेक्शो रां लाइक्चा गेयीनी” दे पुना बाक्त।

44 मिनु पिलातसमी बेकम कों? मबेकम दे मारेइ मतुइकथु कप्तान कली ब्रेशशा “मेको येसु माइशो बेकमे?” दे हिल्लो पवा बाक्त।

45 मिनु कप्तानमी “बेक्त” देंमेनु, लाइक्चा गेवा बाक्त।

46 मिनु योसेफमी बुश वा ग्याप्शा चाक्शा, येसु आ बेक्शो रां रे कांटी उइशशा शोल्शा, बुश वामी गिल्शा लाइशशा, पुक्खी कामी ओइशशा वोदा बाक्त। मेको पुक्खी बेक्शो मुर वोइक्चा कली फुल्लु मुशा, लाप्चो पाइशशा सेल्शा वोइशशा बाक्माक्त। मिनु बेक्शो मुर ओइशशा वोइशशा, फुल्लुमी चोक्शा वोदा बाक्त।

47 मोपा वोइशशा माग्दाला डा मरीयम नु योसेस आ ममा मरीयममी ताम्से बाक्त।

16

येसु बेक्शो रे सेंसाक्व, दे नेंपाइशशा

मत्ती २८:१-१०; लूका २४:१-१२; यूहन्ना २०:१-१०

1 मिनु नाइक्तीक नाक्त नोले माग्दाला डा मरीयम, याकूब आ ममा मरीयम नु सालोमेमी बेक्शो मुर आ रांम खेक्चा कली खेक्तीक ग्याप्मे बाक्त।

2 मिनु हप्ता डा डोंइती नाक्त सुनी कना बोक्शा, नां सोव्रमेनु, पुक्खी गे लमा बाक्त।

3 मिनु लमा लमा “फुल्लु सुमी याक्शा गेबा?” देंमुमा बाक्त।

4 मिनु जाक्दीशशा कोव्रडमेनु, फुल्लु याक्ने थुम्शो तामे बाक्त। मेको फुल्लु शुश ठेयब बाक्माक्त।

5 मिनु पुक्खी ओव्रशा कोव्रडमेनु, बुश वा फेक्शो ठिटा का ग्युरा गे निशशा तशा छक लाक्मा बाक्त।

6 मिनु मेको ठिटामी “मार छक लाक्नी? शीमी क्येप्शा कांटी थोक्शा क्याइशशा नासरथ डा येसु कली माल्थ जाक्नी ममाइ? आ बेक्शो रां वोइक्तीके कोव्रडीन, मबाक्ब। बेक्शो रे सेंसाक्व।

7 मुल लशा, पत्रुस, शेंसीब नेल्ल आन कली नु इन डोंइती तुइक्पाइश्शो खोदेशो पा, इन डोंइती गालील जाक्दीण्ब। मेकेर ग्रुम्चा ताइनीनी, दे शोव्रथ लने” दे माइक्मी बाक्त। मर्कूस १४:२८

8 मिनु मीश मुरपुकी छक लाक्शा, हिंशा खिंखि पा फो फु गूशा प्रोक्मा बाक्त। मिनु सुइ कली मारेइ मदेमा बाक्त। मारदे हना क्युल हिंशो बाक्मा बाक्त।

येसुमी आंम कली तपांइसीशो

लूका २४:३६-४९; यूहन्ना २०:१९-२३

9 हप्ता डा डोंइती नाक्ती सुनी कना येसु बेक्शो रे सेंसीशा, ७ ओटा वोल ग्रुंइचा पुंइसीशो माग्दाला डा मरीयम कली तपांइसे बाक्त। लूका ८:२; यूहन्ना २०:१-१८

10 मरीयममी येसु कली तशा, लशा, डोंइती येसु नु काथा गाक्ब मुल आन थुं खाइश्शा बाक्ब आन कली “गो येसु कली बेक्शो रे सेंसीशा ब्रोंइशो ताता” दे शोव्रडा बाक्त।

11 मेकोपुकीमी मरीयम आ लोव्र थमा मसुदमे बाक्त।

12 नोले येसु कली थमा सुइक्ब निक्शी आस गाउं लसानु, लांमी येसुमी तपांइसे बाक्त। लूका २४:१३-३५

13 मेको निक्शी फ्रा फ्रु लेशशा जाक्शा, अरु आन कली “येसु कली ताइतस्कु” देंसा बाक्त। मिनु मेको आस लोव्र यो थमा मसुदमे बाक्त।

14 मिनु नोले आ शेंसीब ११ जनामी खमे जना जन बाक्मानु, येसुमी मेको आन कली तपांइसे बाक्त। मिनु “मुल सम्म रुप्चा थुं मपनी? मुल यो थमा मसुइय्यीनी?” दे हुइक्तीमी बाक्त। मारदे हना “बेक्शो रे सेंसीशा ब्रोंइशो आंइ मिक्चीमी ताइतक” देंब आन लोव्र थमा मसुइश्शो बाक्मा बाक्त। १कोरिन्थी १५:५

येसु आ नोले डा लोव्र

15 मिनु येसुमी आ शेंसीब ११ जना आन कली “रागी नेल्ल हिरशा, ग्येरपाइक्ब लोत्र नेल्ल आन कली नेंपतीने। मर्कूस १३:१०; मत्ती २८:१६-२०

16 सुमी थमा सुइशशा, ब्वाक्कुमी खुम्शा गुंइचा पुंइसीबा, मेको ब्रोंइचा ताइब। सुमी चहिं थमा मसुइक्बा, मेको सजाइ गेचा पुंइसीब। प्रेरित २:३८; प्रेरित १६:३१-३३

17 थमा सुइक्बपुकी दोदेशो सक्ति पाइशशो दुम्नीम देशा हना, आं नें थिशा वोल् आन कली गुंइशा खेरनीम। परमप्रभु यावे आ सोक्तीमी पपाइशशो लोत्र ब्वाक्नीम। प्रेरित १६:१८; प्रेरित १०:४६; प्रेरित १९:६

18 बुस्स ग्याइक्ताक्म हना यो, ओश्येर तूतेक्म हना यो, मेको आन कली मारेइ मदुम्ब। रोइ पाइब आन तारी गुइ चाक्शा प्रार्थना पामेनु, सानीम” दे माइक्मी बाक्त। लूका १०:१९; प्रेरित २८:३-६; याकूब ५:१४-१५

19 मेको लोत्र नेल्ल थुम्शा नोले प्रभु येसु स्वर्ग लाइक्चा पुंइसे बाक्त। मिनु परमप्रभु यावे आ ग्युरा गे निस्से बाक्त। प्रेरित १:२; भजन संग्रह ११०:१; प्रेरित ७:५५

20 मिनु येसु कली थमा सुइक्बपुकी लशा, ग्येरपाइक्ब लोत्र तेइ तेइ नेंपाइक्ना पाइक्न गाक्मा बाक्त। प्रभु यो मेकोपुकी नु काथा बाक्शा, चिन्ड कोइना कोइन मेको आन लोत्र थमा बाक्ब देबाक्माक्त। प्रेरित १४:३; हिब्रू २:४

lxx

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473